

Cart Nech De'en Bzoj San Pabən' Par Beṇə' Corinto Ca'

Pabən' chzoje' beṇə' ca'
chso'elao' Cristən' Corinton'

1 ¹⁻²Nada' Pab chzoja' le'e
cart nga. Nezczele de que
Diozən' gwleje' nada' par naca'
apostol che Jesocristən', chedə' can'
gwnalaže'e. Chzoja' cart nga par
le'e bagwlej Diozən' nich chdopə
chžagle cho'ela'ole Jesocristən' lao'
syoda Corinton'. Nada' len beṇə'
bišə'əcho Sostenesən' chguapto' le'e
diox. Diozən' bagwleje' le'e can'
gwleje' neto' par naccho lao ne'enə'
laogüe de'en ngodə'əcho txen len
Cristo Jeso'osən'. Chzoja' cart nga
par yoguə'əloḷ beṇə' gatə'ətezə
nite'e, beṇə' chso'on orasyon
chso'olgüiže' Xancho Jesocristən'.
Naque' Xanga'aque' na' leczə
naque' Xancho. ³Chṇaba' lao Xacho
Diozən' na' lao Xancho Jesocristən'
əsa'aclenšgue' le'e na' so'one' par
so cuezle binḷo len xbab de'en yo'o
lo'o yichjla'ažda'olen'.

**Cristən' chone' par nich
zocho mbalaz**

⁴Syempr cho'a yelə' choxcwlen
che Diozən' can' chone' par
nich Cristo Jeso'osən' chaclene'

le'e. ⁵De'en chonḷilažə'əlene'
chaclenchgüe' le'e par nich
chejni'ile yoguə' de'e ca' babzejni'i
Diozən' le'e na' cho'ele dižə'
chei. ⁶Na' bachonle ca nacbia'
de que xtižə' Cristən' de'en
chejle'ele naquən de'e li. ⁷Chaclen
Diozən' le'e len xbab de'en
yo'o lo'o yichjla'ažda'olen' par
gonḷilažə'əchlene' na' par nich
gonchle can' chazlaže'enə' žlac
chbezcho yidə Xancho Jesocristən'
yetlas. ⁸Diozən' gaquəlene' le'e
soczle gonle can' chazlaže'enə'
par nich catə'an yidə Xancho
Jesocristən' yetlas notono gaquə
əne' de que napple doḷə'. ⁹Diozən'
zotezə zoe' chone' complir can'
ne'enə'. Le'enə' bagwleje' le'e par
nich naquə yichjla'ažda'olen' tozə
len yichjla'aždao' Xi'ine' Jesocristən'
ben' naquə Xancho'n'.

**Beṇə' ca' chso'elao' Cristən'
Corinton' bito zjənaque' tozə**

¹⁰Beṇə' bišə', laogüe de'en
chonḷilažə'əcho Xancho Jesocristən'
chneyoida' le'e gonle txen len
ljuežjle na' bito tilə gwšašle. Tozə
xbab gonle na' tozə can' əgwžiale
bia'. ¹¹Beṇə' bišə', beṇə' ca' nitə'

liž Cloe baboso'ozenene' nada' de que chdiłə chšašle. ¹²Enia' chdiłə chšašle, chedə' balle nale: "Naogua' de'en chsed chlo'i Pab." Na' yeballe nale: "Naogua' de'en chsed chlo'i Apolos." Na' yeballe nale: "Naogua' de'en bsed blo'i Cristən'." ¹³¿Echaquele bsełə' Diozən' Cristən' par yebeje' to chopzle xni'a de'e malən'? ¿Ena' chaquele nada' Pabən' gwso'ote' le'e yag corozən' par gwduxjua' xtolə'əle ca'? Na'alje ¿əpor la nada'anə' gwchoale nisən'? Bito. ¹⁴Crispo na' Gayo na'azən' bcho'a nis. Na' choxcwlen Diozən' notoch no zo entr le'e beñə' yesə'əne' de que leczə nada' bcho'aga'aca'ane' nis. ¹⁵Bito che'enda' no əna de que por la' na'anə' gwchoe' nisən'. ¹⁶Na' leczə nada' bchoa' beñə' ca' nitə' liž Estefanasən' nis. Na' bitoch chjsa'alaža'a šə noch zo beñə' bcho'a nis. ¹⁷Nezda' Cristən' bito bsele'e nada' par gwcho'a beñə' nis. Bsele'e nada' par chyixjui'a dižə' güen dižə' cobə che'enə'. Na' catə' chyixjui'an bito cho'a dižə' zdebə de'e cui se'ejni'i beñə'. Bito che'enda' no gaque de que nada' naca' beñə' sin', chedə' šə so'one' xbab che yelə' sin' chia'anə' bito əsa'aque' de que de'e zaque'enə' ca de'en bnežjw cuin Cristən' gwso'ot beñə' le' le'e yag corozən'.

**Cristən' bedəlo'e yelə' chnabia'
na' yelə' sin' che Diozən'**

¹⁸Beñə' ca' cui choso'ozenag che Diozən' yesə'əbiayi'e zejlicane. Lega'aque' bito chse'enene' no güe'elen lega'aque' dižə' can'

gwso'ot beñə' Cristən' le'e yag corozən'. Pero Cristən' babene' par niç chio'o cui yeyejcho lao yi' gabilən'. Na' nezecho de que zaquə'əchgua dižə' de'en cho'echo de que gwso'ote'ene' le'e yag corozən', chedə' dižə' nan' chzejni'in beñə' de que Diozən' nape' yelə' guac par chocobe' yichjla'aždao' notə'ətezcho chonlilažə'əchone'. ¹⁹Chac can' na Xtižə' Diozən' de'en nyojən:

Nada' gona' par niç nacbia' de que beñə' sin' ca' caguə de'e li zjənsine'enə',

na' gona' par niç beñə' ca' chse'ejni'i de'e zan lao yežlyo nga bito bi bi de gon ca de'en chse'ejni'ine'enə'.

²⁰Nitə' beñə' bazjənsed yelə' sin' che beñə'chən', na' nitə' beñə' choso'osed choso'olo'i lei che Diozən', na' nitə' beñə' chso'e dižə' che de'en chac lao yežlyo nga. Beñə' ca' chsa'aque' chso'one' xbab sin', pero lao Diozən' bito bi bi zaquə' xbab chega'aque'enə'. ²¹Diozən' naque' beñə' sin' na' le'enə' bene' par niç yelə' sin' che beñə'chən' bito chaclenən beñə' par so'ombi'ene'. Pero na' con beñə' se'ejle' xtiže'enə' de'en chyixjue'eto', Diozən' chazlaže'e yebeje' lega'aque' xni'a de'e malən', la'añə'əczə beñə' ca' cui zjənombia' Diozən' chsa'aque' de que bito bi bi zaquə' dižə' de'en chyixjue'eto'.

²²Ca naquə beñə' Izrael ca' cui chso'onlilažə' Cristən', chəsə'əñabe' yesə'əle'ine' miłagr par yesə'ənezene' šə le Dioz nan' bsele'e Cristən', na' le'egatezə ca' beñə' ca' cui zjənaquə beñə'

Izrael na' cui chso'onlilaže'e Cristən', zjəchi' yichjga'aque' porzə che bitə'ətezə dižə' cobə de'en chsa'aquene' naquən dižə' sin'.
²³Pero na' neto' chyixjue'eto' can' gwso'ote' Cristən' le'e yag corozən'. Na' catə' chyixjue'eto'on beṇə' Izrael ca' bito chsa'azlaže'e na' bito chse'ejle'e chei. Na' leczə beṇə' ca' cui zjənaquə beṇə' Izraelən' catə' chse'enene' dižə' de'en chyixjue'eto', leczə chsa'aquene' de que bito bi bi zaquə'ən. ²⁴Pero chio'o bagwlej Diozən' par naccho xi'ine', chio'o naccho beṇə' Izrael na' chio'o cui naccho beṇə' Izrael, nezecho de que Diozən' chlo'e yelə' chnabia' che'ena' na' yelə' sin' che'ena' ca de'en bsele'e Cristən' gwso'ote'ene' por ni checho. ²⁵Na' de'en bsele'ene' gwso'ot beṇə' le' por ni chechon' beṇə'chən' chsa'aquene' de que bito bi zaquə' de'en chon Diozən', na' chsa'aquene' de que bito bi yelə' chnabia' napə Diozən'. Na' ca de'en bsele'ene' chlo'en de que Diozən' lechguale beṇə' sin' naque' cle ca beṇə'chən' na' lechguale chnabi'ache' ca beṇə'chən'. ²⁶Le'e gon xbab beṇə' bišə', Diozən' gwleje' chio'o par naccho xi'ine'. Bito naquə zanchə beṇə' sin' segon can' chso'on beṇə'chən' xbab checho, na' nic naquə zanchə beṇə' gwnabia', na' nic naquə zanchə beṇə' blaο.
²⁷Diozən' gwleje' chio'o par naccho xi'ine', la'anə'əczə bito naccho beṇə' sin' na' la'anə'əczə bito naccho beṇə' gwnabia'. Gwleje' chio'o par niçh chzejni'ine' beṇə' ca' cui zjənombi'ene' de que yelə' sin' na' yelə' gwnabia' chega'aque'ena' bito bi zjəzaquə'ən laogüe'ena'.

²⁸Chio'o cui naccho beṇə' blaο na' cui bi zaquə'əcho par beṇə'chən'. De'e na'anə' beṇə' ca' cui zjənombia' Diozən' chəsə'əgue'ine' chio'o. Pero Dioz na'anə' gwleje' chio'o par naccho xi'ine' niçh sa'acbe'ine' de que bitobi bi zaquə' xbab chega'aque'ena' ca de'en choso'ozoe' Diozən' ca'alə.
²⁹Na' Diozən' babene' par niçh notono no gaquə güe'elao' cuine laogüe'ena'. ³⁰Dioz na'anə' babene' par niçh ngodə'əcho txen len Cristo Jeso'osən'. Diozən' banone' chio'o beṇə' sin' chedə' Cristən' naque' beṇə' sin'. Banone' par niçh naccho beṇə' güen laogüe'ena', chedə' Cristən' naque' beṇə' güen laogüe'ena'. Banone' la'ažda'ochon' xi'ilažə' chedə' Cristən' naque' beṇə' la'aždao' xi'ilažə'. Na' leczə le'ena' babene' par niçh cui bi xtolə'əchon' de, chedə' Cristən' gwduxjue' xtolə'əchon'. ³¹Na' nyoj Xtizə' Diozən' nan: "Bito cheya'ə güe'elao' cuincho sino cheya'ə güe'ela'ochə Xancho Diozən'."

**Pabən' be'e xtižə' Cristən'
 ben' gwso'ot beṇə' mal
 ca' le'e yag corozən'**

2 Beṇə' bišə', catə' bedəya'a xtižə' Diozən' gan' zolen' bito bi'a dižə' zdebə de'e cui šejni'ile, na' caguə bi'a dižə' par niçh gonle xbab de que nada' naca' beṇə' sin'.
²Gwnia' lo'o la'aždaogua'a de que žlac soa' len le'e bito bi bichlə dižə' gua'a sino que gua'a dižə' che Jesocristən' na' can' gwso'ote'ene' le'e yag corozən', na' bena' can' gwnia' lo'o la'aždaogua'anə' catə'ən bida' gan' zolenə'. ³Gocbe'ida' bito

bi gaquə gona' par niçh šejle'ele dižə' de'en gua'anə' na' de'e na'anə' lechguale bžeba' na' golə' gwɣiza' catə' bena' xbab šə gwzenagle chia'.
 4Na' catə' bi'a dižə' che Cristən' bito bi'a dižə' len yelə' sin' chia' par niçh gonle can' gwni'anə'. Spirit che Diozən' gocwlenən le'e len yelə' guac cheinə' par niçh gocbe'ile de que dižə' lin' bi'a. 5Bi'a dižə'an ca' par niçh notono no gaquə əna de que chonlilažə'əle Diozən' por ni che yelə' sin' chia'anə'. Nezczecho de que Dioz nan' gocwlene' le'e len yelə' guac che'enə' par niçh chonlilažə'əlene'.

**Spirit che Diozən' chonən
 par niçh chejni'ito'**

6Na' de'e li chaclen Diozən' neto' par niçh cho'eto' dižə' sin' len beṇə' ca' bachselejni'i xtiže'enə'. Pero na' yeziquə'əchlə beṇə' ža' yežlyo nga bito chsa'aque' de que xtižə'əto'on naquən de'e sin'. Na' ni que chsa'aque beṇə' gwnabia' ca' ža' yežlyo nga de que cho'eto' dižə' sin'. Na' ca naquə beṇə' gwnabia' ca' ža' yežlyo nga, gwžin ža catə' te yelə' gwnabia' chega'aque'enə'.
 7Na' dižə' sin' de'en cho'eto', Dioz nan' babzejni'ine'en neto'. Notono gwneze dižə' sin' che'enə' antslə, pero na'a babzejni'ine'en neto'. Lao yelə' beṇə' sin' che Diozən' gwçhoglaogüe'en nac gone' par niçh gone' chio'o yelə' bala'an.
 8Na' ni tozə beṇə' gwnabia' beṇə' ža' yežlyo nga bito gwse'ejni'ine' yelə' sin' che Diozən'. La' žalə' gwse'ejni'ine'en, bito boso'ode'e Xancho Jesocristən' le'e yag corozən', ben' naquə le'ezelaogüe

beṇə' zaque'e. 9Na' Xtižə' Diozən' de'en nyojən nan:

Notono ne'e le'i de'e šao' de'e güen de'en gon Diozən' len beṇə' ca' chsa'aque' che', na' nic nonə' yesə'əneze can' gone', na' nic nonə' gon xbab chei lo'o yichjla'aždaogüe'enə'.

10Pero na'a ža, Diozən' babene' par niçh Spirit che'enə' bzejni'in chio'o ca naquə de'e güen de'en chone' len chio'o chaquecho che'. Tcho'a tšao' chejni'i Spirit che Diozən' can' chone'enə', na' leczə nez nle'in de'en ngašə' len beṇə'chən'.

11Notono no neze bi xbab chon beṇə' yoblə, chedə' con to tocho nezecho bi xbabən' choncho. Na' nic no neze bi xbabən' chon Diozən'. Spirit che' na'azən' nezen bi xbabən' chone'. 12Na' Diozən' bsele'e Spirit che'enə' zon lo'o la'ažda'ochon' par niçh chnezecho yoguə'əlo' de'e šao' de'e güen de'en chon Diozən' len chio'o laogüe de'en nži'ilaže'e chio'o. De'e na'anə' bitoch choncho xbab ca xbab de'en chso'on beṇə' yeziquə'əchlə ža' yežlyo nga. 13Neto' cho'eto' dižə' che de'e ca' chon Diozən' len chio'o, pero caguə cho'eto'on lao yelə' beṇə' sin' cheto'onə'. Spirit che Dioz nan' chzejni'in neto' dižə' de'en cho'eto'onə'. Na' beṇə' ca' bayo'o Spirit che Diozən' lo'o yichjla'ažda'oga'aque'enə', lega'acze'enə' chse'ejni'ine' de'en chsed chlo'iga'aque'tone'.

14Na' beṇə' ca' cui yo'o Spirit che Diozən' lo'o yichjla'ažda'oga'aque'enə', bito gaquə se'ejni'ine' de'en

chsed chlo'i Spiritən' chedə'
 chsa'aquene' bito bi bi zaquə'ən
 par lega'aque'. Bito chse'ejni'ine'en
 chedə' bito yo'o Spiritən' lo'o
 yichjla'ažda'oga'aque'enə' par
 gaquəlenən lega'aque' se'ejni'ine'en.
¹⁵Chio'o bayo'o Spirit che Diozən'
 lo'o yichjla'ažda'ochon', de'e
 na'anə' chaclenən chio'o par niçh
 chacbe'icho che bitə'ətezə de'en
 goncho šə naquən güen o šə naquən
 mal gonchon. Pero na' beṇə'
 yeziquə'əchlə bito chse'ejni'ine' de
 que de'en chene'e Spirit che Diozən'
 gon chio'o naquən de'e güen.
¹⁶Na' Xtižə' Diozən' de'en nyojən
 nan: "Notono zo no chejni'i xbab
 che Xancho Diozən' to gwlažze'.
 Na' Diozən' bito bi de de'e əgwsed
 əgwlo'i beṇəçən' le'." Pero Diozən'
 babene' par niçh choncho xbab can'
 chazlažə' Cristən'.

Txenṇə' gwso'one' xšin Diozən'

3 Beṇə' bišə', catə' bi'a xtižə'
 Diozən' len le'e, bito bi'an can'
 cho'an len beṇə' ca' bachoso'ozenag
 che Spirit che Diozən', chedə' le'e
 ne'e chzenagle che la'ažda'omallen'.
 La'anə'əczə bachonlilažə'əle Cristən'
 gwxaquə'əlebele ca bidao'. ²Catə'
 ze'e gwzolaole chonlilažə'əle
 Cristən' gwxaquə'əlebele ca bidao'
 ne'e chsa'ažə' laogüe de'en cuinə'
 šejni'iša'ogüe'ele de'e ca' chene'e
 Diozən' šejni'ile. De'e na'anə' bsed
 blo'ida' le'e de'e ca' cui naquə zdebə
 šejni'ile, na' xte ža neža ne'e chsed
 chlo'ida' le'e ca' chedə' cuinə' gac
 šejni'ile de'en naquə zdebə. ³Nacia'
 bitonə' gac šejni'ile de'en naquə
 zdebə, chedə' ne'e chzenagle che
 la'ažda'omallen'. De'en chgue'i

ljuežjle na' chdiḷə chžašle zeje dižə'
 chzenagczle che la'ažda'omallen'
 can' chso'on beṇə' ca' cui
 chso'onlilažə' Cristən'. ⁴Chzenagle
 che la'ažda'omallen' ca de'en na
 baḷle: "De'en chsed chlo'i Pabən'
 naogua'", na' yebaḷle nale: "De'en
 chsed chlo'i Apolosən' naogua'."
 De'e na'anə' nia' chonle can'
 chso'on beṇə' ca' cui chso'onlilažə'
 Cristən'.

⁵¿Noxa nada' Pab na' noxa
 Apolosən'? Neto' naquəto' beṇə'
 güen xšin Diozən' na' neto'
 be'elento' le'e xtiže'enə'. Na' cuin
 Diozən' bene' par niçh baḷle
 beṇlilažə'əle Cristən' catə' bi'a
 dižə' güen dižə' cobə che'enə'
 len le'e na' leczə bene' par niçh
 yebaḷle beṇlilažə'əle Cristən'
 catə'ən Apolosən' be'elene'en le'e.
⁶Zgua'atec nadan' be'elena' le'e
 xtižə' Diozən' na' gwxaquə'əlebəda'
 ca to beṇə' chaz. Na' laogüe de'en
 leczə bsed blo'i Apolosən' le'e,
 gwxaquə'əlebene' ca be'en chyiḷ.
 Na' can' chon Diozən' niçh chcha'o
 chxen de'en chazcho, leczə can'
 bene' par niçh gwyejle'ele xtiže'enə'
 de'en be'elento' le'e. ⁷Bitotec bi
 zaca'a nada' de'en be'elena' le'e
 xtižə' Diozən', na' nic Apolosən'
 de'en bsed blo'ichene'en le'e. Dioz
 nan' zaquə' chedə' le'enə' bene'
 par niçh gwyejle'ele xtiže'enə'.
⁸Ben' chyixjue'e xtižə' Diozən' de'e
 neche na' ben' chyixjue'en de'e
 gwchope, txenṇə' chso'one' xšin
 Diozən' na' tozəczə can' cheyaḷə'
 gapəga'acchone' respet. Na' Diozən'
 gone' par niçh to toe' yesə'anite'e
 mbalaz segon can' gwso'one'
 xšine'enə'. ⁹Neto' ža, txenṇə'

chonto' xšin Diozən' entr le'e. De'e na'ana' gwxaquə'əlebeto' ca beṇə' goz go'onə' na' le'e gwxaquə'əlebele ca yežlyon' gan' chac žinṇə'.

Na' leczə le'e chdopə chžagle cho'ela'ole Cristən' yoguə'əle txen gwxaquə'əlebele ca to yo'o cḥe Diozən' na' neto' gwxaquə'əlebeto' ca beṇə' ben yo'onə'. ¹⁰Diozən' goclene' nada' par niḥ naca beṇə' nech bena' xšine'enə' entr le'e. De'e na'ana' gwxaquə'əlebəda' ca beṇə' bxe lan yo'o. Na' bena' xšine'enə' ca chon to mues beṇə' chacchgua. Na' nita' beṇə' yoblə beṇə' leczə bososə'osed bosolo'oline' le'e na' lega'aque' gwxaquə'əlebəga'aquene' ca beṇə' gosə'əbec ze'enə'. Na' šə nochlə beṇə' yosə'osed yosolo'oline' le'e, cheyalə' so'one' xbab par niḥ yosə'osed yosolo'oline' le'e porzə de'en naquə de'e li. ¹¹Le'e chdopə chžagle cho'ela'ole Jesocristən' yoguə'əle txenṇə' gwxaquə'əlebele ca to yo'o de'en chac, na' Jesocristən' gwxaquə'əlebene' ca lan yo'onə'. Na' šə no chene'e əgwxe laneinə' de'e yoblə, bitoch gaquə, cḥedə' tozə Jesocristən' zaquə'e par gonlilažə'əchone'. ¹²Nezecho chcheje bitə'ətezə ze'e de'e chxe beṇə' lao lan yo'onə' segon šə none'en de or, de plət, de yej fin, de yag, de yix, o de dod. Can' gwxaquə'əlebe de'en yosə'osed yosolo'oli beṇə' le'e. ¹³Na' catə' əžin ža cḥoglaio Diozən' cḥe yoguə'əlol beṇə', cana'ach la'alaon cḥe to to beṇə' bososə'osed bosolo'oline' le'e šə bososə'osed bosolo'oline' le'e de'en naquə de'e li, o šə cui. Na' šə bososə'osed bosolo'oline' le'e de'en naquə de'e

li, gwxaquə'əlebəga'aquene' ca to beṇə' ben yo'o de or de plət o de yej fin cḥedə' de'e ca' bito chse'eyən. Pero na' šə bososə'osed bosolo'oline' le'e clelə, gwxaquə'əlebəga'aquene' ca to beṇə' ben yo'o de yag, de yix, o de dod cḥedə' de'e ca' chse'eyən. Catə' əžin žan' cḥoglaio Diozən' cḥe yoguə'əlol beṇə', gone' ca la'alaon šə de'en ben to to beṇə' güen xšine'enə' naquən de'e zaquə'e o šə bito bi zaquə'ən. Ca'aczən' nla'alaon cḥe to to yo'o segon naquən' zjənaquən. ¹⁴Beṇə' ca' bososə'osed bosolo'oline' le'e de'en naquə de'e li, cuin Diozən' gone' ca yesə'əzi' benə' ca' yelə' bala'aṇ. ¹⁵Pero beṇə' ca' bososə'osed bosolo'oline' le'e clelə gwxaquə'əlebəga'aquene' ca beṇə' šey ližen'. Na' nacchguaze gaquə yesə'əchoje' par cui se'eye', bito bi yelə' bala'aṇ yesə'əzi'e cḥedə' bito bososə'osed bosolo'oline' le'e can' cheyalə'.

¹⁶Chio'o chdopə chžagcho cho'ela'ocho Jesocristən', yoguə'əcho txenṇə' gwxaquə'əlebecho ca to yo'odao' gan' chso'elao' beṇə' Diozən' cḥedə' Spirit cḥe'enə' zon lo'o yichjla'ažda'ochon'. ¹⁷Na' šə to beṇə' gone' par niḥ chio'o chdopə chžagcho cho'ela'ocho Cristən' cuejyichjcho dižə' li cḥe Diozən', Diozən' gwnežjue' castigw zejlicanə cḥe ben' gon ca', cḥedə' bagwlej Diozən' chio'o par naccho lažə' ne'enə' na' zo Spirit cḥe'enə' lo'o yichjla'ažda'ochon'.

¹⁸Šə nocho chaquecho nsi'incho, bito cheyalə' xoayagcho. Cheyalə' gacbe'icho de que bitotec bi zaquə' xbab cḥechon' niḥ ca' Diozən' gone'

chío'o yelə' sin' che'enə'. ¹⁹Benə' ca' cui zjənombia' Diozən' yelə' sin' chega'aque'enə' bitobi zaquə'ən lao Diozən'. La' nyojczə Xtižə' Diozən' nan: "Benə' ca' chsa'aquene' zjənaque' benə' sin', Diozən' gone' par niç yesə'əbiayi'e por ni che xbab mal chega'aque'enə'." ²⁰Na' yeto gan' nyojən nan: "Xancho nan' neze de que xbab che benə' sin' ca' bito gaquəlenən leg'a'aque' par so'ombi'ene'." ²¹Ca naquə neto' əbsed əblo'ito' le'e, bito gonle xbab de que naquəto' le'ebeyože benə' zaque'e. Dioz na'aczən' bsele'e yoguə'əto' par chaclento' le'e na' bsi'e xneze par niç bitə'ətezəchlə de'e zjəde na' de'e ca' chac chsa'aclenən le'e. ²²Diozən' bsele'e nada' na' Apolosən' na' Bedən' par chaclento' le'e. Na' bene' yežlyon' par niç lecə chaclenən chio'o. Na' chone' par niç bitə'ətezə de'en chac checho lao mbancho o catə'ən gatcho əsa'aclenən chio'o na'a na' batə'ətezəchlə. ²³Na' laogüe de'en cho'ela'ocho Cristən' ngodə'əcho txen len le' can' ngode'e txen len Xə' Diozən'.

De'en gwlo'o Diozən' lao na' apostol ca' par gwsə'one'

4 Cheyalə' gonle xbab de que naquəto' benə' güen xšin Cristən'. Diozən' babzejni'ine' neto' de'en cui no gwneze antslə, de'e na'anə' Cristən' ngüe'e lao na'ato' chsed chlo'ito'on benə'. ²Na' chonən byen gonto' complir de'en ngüe'e lao na'ato' gonto'. ³Na' ca naca' nada' bitobi nonən len nada' la'anə'əczə šə jostis o šə le'e chaquele de que bito chona'

can' cheyalə' gona'. Bito nia' šə chona' can' cheyalə' gona' o šə cui. ⁴Nada' chacda' de que bito bi dolə' napa' len bitə'ətezə de'e chona', pero caguə ni che de'e na'anə' əna Diozən' chia' de que bito bi xtolə'a de. Xancho Cristən' əne' šə chona' can' cheyalə' gona' o šə cui. ⁵De'e na'anə' bito cheyalə' bi ənacho che notə'ətezə benə' šə chone' can' cheyalə' gone' o šə cui. Catə'əchən' yidə Xancho Cristən' yeto, ca na'achən' gone' par niç ənezecho de'en cui nonə' neze na'a. Gone' par niç yeyacbe'icho xbab de'en yo'o lo'o yichjla'aždao' to tocho, na' cana'achən' Diozən' əne' šə nochon' chon güen.

⁶Benə' bišə', babi'a xtižə' Apolosən' na' xtižə'a par niç šejni'ile can' na xtižə' Diozən' de que bito cheyalə' güe'ela'ocho che to benə' šə naquən' chsed chlo'ine' na' ni que gue'icho che yetoe'. ⁷¿Echaquele de que zaquə'əchle cle ca benə' ca' yelə'? ¿Ede bi de'e de chele de'e cui benə' Diozən'? Bito bi de. Nezele naquən de'e benə' Diozən' le'e, de'e na'anə' bito cheyalə' ga'alazə'əle len de'en deilen'?

⁸Chacljeile bitoch bi chyažjele, na' de que bazole mbalaz la'anə'əczə cui chac cheto' ca'. Yebeito' žalə' de'e licə zole mbalaz na' soto' mbalaz txen len le'e žalə' ca'. ⁹Diozən' bsele'e neto' apostol naquəto' ca to benə' le'ezelaogüe cui zaque'e o ca benə' nchoglaon che' gate'. Na' Diozən' bsi'e xneze par niç angl ca' na' benə' ca' ža' yežlyon' chəsə'əgüie' can' chac cheto' can' chəsə'əgüia benə' to comedy. ¹⁰Benə'chən' chsa'aquene'

bito bi bi zaquə'əto' por ni che de'en chonto' xšin Cristən'. Pero na' le'e ža, chonle par nič chsa'aquene' nacle beṇə' sin' la'aṇə'əczə ngodə'əle txen len Cristən'. Neto' nezetə' caguə bi chac gonto', pero le'e chaquele chac gonle bitə'ətezə. Chso'elao' beṇə' le'e na' chəsə'əgue'ine' neto'. ¹¹Xte ža neža zan las cui de de'e ye'ej de'e gaoto', na' bito bi xala'anto' de, na' chəsə'əbažə' beṇə' neto', na' nic bi ližto' de. ¹²Na' len ni'a na'ato' chonto' žin par nič chon cuinto' mantener. Na' catə' choso'ožia choso'onitə' beṇə' neto', nachle chṇabto' nite'e mbalaz, na' catə' choso'oči' choso'osaquə' beṇə' neto', chgo'o chchejlažə'əto' ca de'en choso'oči' choso'osaquə'le neto'. ¹³Na' catə' beṇə' chne' cllə cheto', nachle cho'elenga'acto'one' dižə' šao'. Na' xte ža neža nitə' beṇə' chəsə'əgue'ine' neto' ca chəsə'əgue'ine' no beb na' can' chəsə'əgue'ine' no de'e naquə zban.

¹⁴Na' ca naquə de'e ca' de'en bač bzoja' le'e, bito bzoja'an par nič gaquele zto'. Nacle ca xi'ina' na' chacda' chele. De'e na'anə' chona' le'e consejw quinga. ¹⁵Nitə'əlja ši mil beṇə' choso'osed choso'olo'ine' le'e che Cristən', pero toza' nada' naca' ca xale chedə' zgua'atec nada' gwɔdixjui'a dižə' güen dižə' cobə che Cristo Jeso'osən' len le'e par nič chonlilažə'əlene'. ¹⁶Na' de'en naca' ca xale de'e na'anə' chneyoida' le'e gonle can' chona'anə'.

¹⁷De'e na'anə' bsela'a Temtion' gan' zolenə'. Banona'ane' ca xi'ina' beṇə' chacda' chei laogüe de'e bsd blo'ida'ane' par

chonlilažə'e Xancho Cristən'. Na' zoteze' chone' complir can' cheyalə' gone'. Na' Temtio na'anə' gone' par nič əžjsa'alažə'əle de'en babsed bablo'ida' le'e che Cristən' ca de'en chsed chlo'ida' beṇə' ca' chəsə'ədorə chəsə'əžag chso'elaogüe'e Cristən' gatə'ətezə nite'e. ¹⁸Balle nale de que bito bi zaca'a parzə nič chon cuinle xen na' chonle ca' laogüe de'en chonle xbab de que bitoch yida' gan' zolenə'. ¹⁹Pero caguə chžach yida' gan' zolenə' šə Xancho Diozən' güe'e latjə. Na' catə' yida' cana' degüia' gonle can' nalenə'. ²⁰Ca naquə beṇə' ca' chnabia' Diozən' lega'aque', Diozən' chone' par nič gaquə so'one' can' chso'e dižə'ən. Caguə con chəsə'ənaze'ənə'. ²¹¿Nac chene'ele gona'? ¿Egüida' gan' zolenə' par gona' le'e castigw o šə yida' gwlo'a can' chacda' chele sin cui bi dižə' əṇia' le'e? Legon xbab naquən' chene'ele gona'.

To beṇə' gwzolen no'ol che x'e'ənə' ca xo'oləcze'

5 Chso'echgua beṇə' xtižə'əle de que zo to beṇə' byo entr le'e beṇə' zolene' no'ol che x'e'ənə' ca xo'oləcze'. Beṇə' ca' cui chso'elao' Diozən' bito chžinlažə'e de'e yelə' zton' chso'one' ca de'e yelə' zto'onə' chon be'ənə'. ²Na' la'aṇə'əczə chac ca' cho'elao' cuinle. Bito güe'elao' cuinle. Cheyalə' yegüine'ele na' cuich güe'ele latjə gone' txen len le'e. ³La'aṇə'əczə bito zoa' na' len le'e, bagwchoglaogua'an can' cheyalə' gonle len be'en chon de'e malən'. Na' le'e ža, le'e gon cuent lažə'əle de que naquəczcho

txennə' šə bachonle ca'. ⁴Na' catə' bandopə nʒagle cho'ela'ole Xancho Jesocristən', zocze' chaclene' le'e len yelə' chnabia' che'enə', na' nada' choncza' txen len le'e. ⁵Catə' bandopə nʒagle txen, legwʒon gon be'enə' txen len chio'o chonlilažə'əcho Jesocristən' na' le'e cueje' ca'alə par niç gon Satanasən' con nac chene'en len le'. De repent šə çhi' saque'e n̄a'a len cuerp che'ena' goša'alja yichjla'aždaogü'e'ena' niç cui si'e castigw zejlicane catə'an əžin ža çhoglao Xancho Jesocristən' naquən' gac che to to beṇačən'.

⁶Bito naquən güen can' chonle cho'elao' cuinle chaquele chebei Diozən' le'e. Nezele catə' choncho yetxtil latə' xne'in chonən par niç cheyas doxen coazin'. Le'egatezəczə ca' catə' cho'ele latjə chcha'o chxench bitə'ətezə de'e mal entr le'e, yoguə'alen' chaple dolə' chedə' yoguə'alen' chonlenle ben' chon de'e malən' txen. ⁷⁻⁸Beṇə' Izrael gwlaž çheto' ca' chsa'ape' cuidad cui chsa'ogü'e' yetxtil de'e nçhiçə xne'i lao lni pascon' na' chsa'ape' cuidad par niç cui bi bi xna' cuazin' chega'an lo'o yo'o ližga'aque' lao lnin'. Ca'atezəczən' chio'o chonlilažə'əcho Cristən' cheyalə' gapcho cuidad do tyempte par niç cui bi de'e mal goncho na' cui bi de'e mal ta' əchen yichjla'ažda'ochon'. Cheyalə' cuejyichjcho de'e malən' chedə' Cristən' gwdixjue' xtolə'əchon' par bebeje' chio'o xni'a de'e malən'. Na' de'en gwso'ote' le' por ni checho gwxaquə'əlebene' ca xilə' daon' bian' chso'ot beṇə' Izrael ca' lao

lni pascon'. De'en chonlilažə'əcho Cristən' ža, cheyalə' cuejyichjcho de'e malən' na' goncho porzə de'e güen.

⁹Bzoja' to cart par le'e na' gwnia' de que bito cheyalə' socho binlo len beṇə' chgo'o xtoi na' be'enə' chbejyichj no'ol çhei o be'en çhe' par chzolene' beṇə' yoblə. ¹⁰Catə' nia' cabi cheyalə' socho binlo len lega'aque', bito cho'a dižə' che beṇə' ca' cui naccho txen cho'ela'ocho Cristən' sino que cho'a dižə' che ljuējzcho beṇə' lecə chso'elao' Cristən'. Na' lecə ca' nia' bito socho binlo len beṇə' chəsə'əzelazə' bi de'e de che beṇə', nic len beṇə' chəsə'əca'a bi de'e de che beṇə', na' nic len beṇə' chso'elao' lgua'a lsaquə'. Nia' ca' che ljuējzcho beṇə' ca' naccho txen cho'ela'ocho Cristən'. Žalə' cui chac socho binlo len beṇə' ca' cui chso'elao' Cristən', bitoch gac socho yežlyo nga žalə' ca'. ¹¹Šə entr le'e nitə' beṇə' nacho bišə'əcho beṇə' chəsə'əža' xtoga'aque' o beṇə' chəsə'əbejyichj no'ol çhega'aquei o be'en çhega'aquei par chəsə'əzolene' beṇə' yoblə, o beṇə' chəsə'əzelazə' bi de'e de che beṇə', o beṇə' chse'ejni'alažə' lgua'a lsaquə', o beṇə' choso'ožia choso'onitə' ljuējzga'aque', o beṇə' gü'e zo, o beṇə' bgüan, bito cheyalə' sole binlo len lega'aque'. Na' bito cheyalə' gaolenga'aclene' txen. ¹²Beṇə' ca' chəsə'əadopə chəsə'əžag chso'elaogü'e' Cristən' txen len chio'o cheyalə' çhoglaochon çhega'aque' catə' əsa'ape' dolə', pero bito bi cheyalə' əṇacho che beṇə' ca' cui chso'elao' Cristən' txen len chio'o. ¹³Diozən'

əne' che beɲə' ca' cui chso'elao'
Cristən' de que zjənapə' dolə'. Na'
ca naquə be'ena' chon de'e malən'
ben' cho'elao' Cristən' txen len
chio'o, cheyalə' cuejchone' ca'alə.

**Bito ye'echo beɲə' cui zjənombia'
Diozən' so'one' yelə' jostis chechon'**

6 Catə' chaole xya tole yetole
chjəɲabele beɲə' ca' cui
choso'ozenag che Diozən' par
so'one' yelə' jostis chelen' lgu'a'a
ɲabele beɲə' ca' bagwlej Diozən'
par zjənaque' lažə' ne'ena. ¿Ebito
chacbe'ile cleveland' chonle? ² ¿Ecabi
nezele de que gwžin ža catə' chio'o
naccho lažə' na' Diozən' goncho
yelə' jostis che beɲə' yeziquə'achlə
ža' yežlyo nga? Na' ca naquə
goncho yelə' jostis chega'aque'en,
guaquəczə goncho yelə' jostis che
de'e ca' cuitec zjəzaque'e. ³ Leczə
əgwžin ža goncho yelə' jostis
che angl ca'. Na' naquəchxen'
gaquə goncho yelə' jostis che
de'e chso'on beɲə' lao yežlyo nga.
⁴ Na' catə' gaquəyōžə ljuēžjle, bito
cheyalə' žja'acle lao beɲə' ca' cui
chso'onlilažə' Cristən' par so'one'
yelə' jostis chelen', chedə' bitotec
bi zjəzaque'e par chio'o chdopə
chžagcho cho'ela'ocho Cristən'.
⁵⁻⁶ Che'enda' gaquəchgüeile lo'o
yichjla'ažda'olen' ca de'en chja'acle
lao jostis ca' cui chso'onlilažə'
Cristən' chjətaole xya tole yetole
le'e nacle bišə'əcho. ¿Eniga tole cui
nacle beɲə' si'innə' par gon yelə'
jostis che ljuēžjle catə' bin' chac
chele?

⁷ Lechgualə cleveland' chonle
batə'ətezə chaole xya tole yetole.
Mbalazəch zole žalə' chdele ca'alə

šə bi de'en chone ljuēžjlen' le'e,
na' mbalazəch zole žalə' güe'ele
latjə yesə'əque'e bi de'e de chele.

⁸ Chebanda' can' chonle contr
ljuēžjle na' chca'ale bi de'e de
chega'aque' la'əɲə'əczə zjənaque'
txen len chio'o chonlilažə'əcho
Cristən'.

⁹ Bito goncho xbabən' clellə.
Notə'ətezcho šə zotezcho choncho
de'e malən' bito gaquə yežincho yoban'
gan' zo Diozən' chnabi'e. Nitə' beɲə'
chəsə'əgo'o xtoi na' beɲə' chso'on
bichlə de'e yelə' zto' de'en nac ca'.
Nitə' beɲə' chso'elao' lgu'a' lsaquə'.
Nitə' beɲə' chəsə'əbejyichj no'ol chei
o be'en chei par chəsə'əzolene' beɲə'
yoblə, na' beɲə' chəsə'əzolentezə
le'e ljuēžj beɲə' byoga'aque' lgu'a'a
de'e yesə'əca'a no'ol chega'aque',
na' no'ol ca' chəsə'əzolentezə ljuēžj
no'oləga'aque' lgu'a'a yesə'əque'e
beɲə' byo. ¹⁰ Nitə' beɲə' chəsə'əban
na' beɲə' chəsə'əzelažə' bi de che
beɲə'; na' beɲə' güe'ele zo; na' beɲə'
choso'ožia choso'onitə' ljuēžjga'aque';
na' beɲə' chəsə'əxoyague' par niçh
yesə'əque'e bi de'e de che beɲə'.
Ni to beɲə' chon de'e mal ca' cui
gaquə yesyə'əžine' yoban' gan' zo
Diozən' chnabi'e. ¹¹ Balcho bencho
de'e mal ca' antslə. Pero ɲa'a de'en
chonlilažə'əcho Xancho Jesocristən',
Spirit che Dioz chechon' babocobən
yichjla'ažda'ocho' par niçh naccho
beɲə' la'aždao' xi'ilažə', naccho lažə'
na' Diozən' na' naccho beɲə' güen
laogüe'ena'.

**Cheyalə' goncho len cuerp chechon'
ca si' Diozən' yelə' bala'an**

¹² Nitə' beɲə' chəsə'əne' de que
de lsens par goncho bitə'ətezə,

pero nezecho caguə yoguə' de'en gonchon' naquən güen par chio'o. Na' la'anə'əczə šə chəsə'əna beṇə' de que de lsens par goncho bitə'ətezə, bito cheyaḷə' güe'echo latjə par niḅ bi de'en goncho nabia'an chio'o. ¹³Leeczə nitə' beṇə' chəsə'əne': "Nsa' le'echon' par yeḷə' guao, na' deczə yeḷə' guaon' par lenṇə." De'e ličzə can' chəsə'əne'ena', pero na' le'echon' len yeḷə' guaon', əžin ža catə' gon Diozən' par niḅ te chega'aguən. Na' cuerp chechon' bito naquən par niḅ co'o xtocho o par niḅ goncho bichlə yeḷə' zto' de'en nac ca'. Naquə cuerp chechon' par niḅ socho güe'ela'ocho Xancho Cristən', na' Xancho' zocze' par gaquəlene' chio'o. ¹⁴Diozən' bosbane' Xancho Cristən' ladjo beṇə' guatən', na' leeczə ca' əžin ža catə' yosbane' chio'o ladjo beṇə' guatən' len yeḷə' guac che'ena'.

¹⁵İEcabi nezele de que ngodə'əcho txen len Cristən' par niḅ nabi'e cuerp chechon'? Na' de'en ngodə'əcho txen len le', bito cheyaḷə' so xtocho beṇə' gon cuerp chechon' lao ne'e. ¹⁶Catə' to beṇə' chatə'əlene' xtoe' cuerp chega'aque'ena' chsa'aguən tozə, can' nyoj de'en gwna Diozən': "Beṇə' ca' čhopə əsa'aque' tozə cuerp." ¹⁷Pero chio'o ngodə'əcho txen len Xancho Cristən' na' naquə yichjla'ažda'ochon' tozə len le'.

¹⁸De'e na'anə' bito co'o xtocho na' bito goncho bitə'ətezəchlə de'e ca' zjənac ca'. De'e mal ca' yeziquə'əchlə bitotec chso'onən contr cuerp chechon', pero šə co'o xtocho o šə goncho bichlə

de'e yeḷə' zto' de'en nac ca', lega'aguən chso'onən contr cuerp chechon'. ¹⁹Spirit che Diozən' zon lo'o yichjla'aždao' to tocho ca to beṇə' zo lo'o yo'o che'. Dioz nan' bsele'e Spirit che'ena' zon lo'o la'ažda'ochon' par chnabia'an chio'o. Caguə chio'o əṇacho naquən' gonchon'. ²⁰Xancho Cristən' gwduxjue' xtoḷə'əchon' par niḅ naccho xi'iq̄ Dioz. De'e na'anə' cheyaḷə' goncho len cuerp chechon' na' len yichjla'ažda'ochon' ca si' Diozən' yeḷə' bala'an.

Cho'e dižə' che yeḷə' gošagna'anə'

7 Na' de'e ca' bzojle nada' le'e cartən', de de'en che'enda' nia' le'e. Šə no beṇə' byo bito chene'ene' si'e no'olə gaque' xo'ole', güennə' chone'. ²Pero na' de'e nxož co'o xtole, de'e na'anə' naquəchən güen əgwšagna'ale par niḅ ca' to to beṇə' byo so xo'ole' na' to to no'olə so be'en che'. ³Na' le'e beṇə' byo, yeyatə'əlen no'olə che chele. Le'egatezəczə ca' le'e no'olə yeyatə'əlen be'en che chele. ⁴Ca naquə no'olən' caguə le' əṇə' nac gone' len cuerp che'ena'. Le'egatezə ca' beṇə' byon' leeczə caguə le'ena' əṇə' nac gone' len cuerp che'ena'. Čhopte'en cheyaḷə' yoso'ozenag che lježjga'aque'. ⁵Na' le'e beṇə' nšagna' bito əgwžonle yeyatə'əlen be'en chele o no'ol chele. Pero de'e gaquəczən' šə yeḷə' goxia che čhople cuezle to term güejə par niḅ sotezle gonle orasyon. Na' te termən' yeyatə'əlen be'en chele o no'ol chele de'e yoblə par niḅ Satanasən' cui gaquə co'oyeḷə'ən le'e gonle de'e malən' laogüe de'e tant nan solen lježjle.

⁶De'e quinga nia' chedə' de lsens par nich to to beṇə' byo si' xo'ole' na' to to no'olə si' be'en che', pero bito nacho de que chon Diozən' mendad goncho ca'. ⁷Chebeida' žalə' yoguə'əle sole ca nada', cui no xo'ola' zo. Pero na' nža' can' baben Diozən' par zo to tocho na' nža' can' chene'ene' goncho.

⁸Le'e cuiṇə' gwšagna'ale, chacda' naquəchən güen yega'anle can' zoa' nada' na' cui əgwšagna'ale. Na' le'e bagot be'en chele o no'ol chele, chacda' leczə naquəchən güen cui yošagna'ale. ⁹Pero na' le'e beṇə' byo šə lechguale nan solenle no'olən', na' le'egatezə ca' le'e no'olə šə lechguale nan solenle beṇə' byo, mejor əgwšagna'ale par nich ca' bito nabia' yelə' chzelažə'ənə' le'e.

¹⁰Le'e no'olə le'e nšagna'ale, chona' mendad bito yela'ale be'en chele. Na' bito gaquele de que nadəza'an ənia' ca'. Naquən to de'e chon Xancho Cristən' mendad cui goncho. ¹¹Na' šə no'olən' ye'le be'en che'enə', cheya'ə' yega'anə' sin cui yeque'e beṇə' yoblə o cheya'ə' yeyeje' žjəyezolene' be'en che'enə' de'e yoblə. Na' le'e beṇə' byo le'e nšagna'ale, bito yela'ale xo'ollenə'.

¹²Na' le'e beṇə' yeziquə'əchlə, ənia' can' chona' xbab cheya'ə' gonle, la'anə'əczə Xancho Cristən' bito bi gwne' che de'e ca'. Šə entr le'e zo to beṇə' zo xo'ole' no'olə cuiṇə' gonlilažə' Cristən', na' šə zo no'olən' gan par soteze' yega'anlene' be'en che'enə', bito cheya'ə' yela'a beṇə' byon' le'. ¹³Na' šə entr le'e zo to no'olə na' cuiṇə' gonlilažə'

be'en che'enə' Cristən', šə be'en che'enə' zoe' gan par yesə'ənite'e, bito cheya'ə' yesyə'əle'e. ¹⁴Bito naquən mal lao Diozən' par no'olən' chonlilažə' Cristən' solene' be'en che'enə' la'anə'əczə šə be'en che'enə' cuiṇə' gonlilaže'e Cristən'. Leczə bito naquən mal lao Diozən' par beṇə' byon' chonlilažə' Cristən' solene' no'ol che'enə' la'anə'əczə no'olən' cuiṇə' gonlilaže'e Cristən'. Žalə' chgue'i Diozən' yesə'əzolen ljuəžjga'aque' leczə gwgüe'i Diozən' bi'i chega'aque'enə', pero Diozən' chaquene' che xi'inga'aque'enə'. ¹⁵Pero na' šə beṇə' byon' o no'olən' ben' cui chonlilažə' Cristən' bitoch chene'ene' solene' be'en che' o no'ol che' ben' chonlilažə' Cristən', bito gwzonle yesyə'əla'aga'aque'. Bito chonən byen yesyə'əga'anlen ljuəžjga'aque' chedə' la' Diozən' chene'ene' socho binlo len be'en checho o no'ol checho. ¹⁶Le'e no'olə le'e chonlilažə'əle Cristən', šə sotezle len be'en chele be'en cuiṇə' gonlilaže'e Cristən', de repent guaquəlenlene' par nich gonlilaže'e Cristən'. Na' le'e beṇə' byo le'e chonlilažə'əle Cristən', šə sotezle len no'ol chelen' la'anə'əczə cuiṇə' gonlilaže'e Cristən', de repent guaquəlenlene' par nich gonlilaže'ene'.

¹⁷Na' ca naquə žin de'en nlanle catə' gwlej Diozən' le'e par chonlilažə'əle Cristən' guaquəczə gonchlen. Na' šə banšagna'ale catə'an gwlej Diozən' le'e par chonlilažə'əle Cristən', con ca'aczən' cheya'ə' so cuezle, chedə' can' no'e Xancho Cristən' chele gonle. Leczə can' babena'

mendad len beṇə' ca' chəsə'ədopə chəsə'əžag chso'elaogü'e Cristən' gatə'ətezəchlə, leczə can' chona' mendad len le'e. ¹⁸Šə bazole seṇy de'en ne' sirconsisionṇə' catə'ən gwlej Diozən' le'e par chonlilažə'əle Cristən' bito gonle par niçh yenit seṇyən'. Na' šə balle cuinə' sole seṇy de'en ne' sirconsisionṇə' catə'ən gwlej Diozən' le'e par chonlilažə'əle Cristən', bito gonle byen par solen. ¹⁹Bito naquən to de'e žialao len chio'o šə nsa'acho seṇy de'en ne' sirconsisionṇə' o šə cui nsa'achon. De'en naquə de'e žialao len chio'o, goncho con can' non Diozən' mendad. ²⁰Con can' naccho yoguə'əcho catə'ən gwlej Diozən' chio'o par chonlilažə'əcho Cristən', šə nsa'acho seṇy de'en ne' sirconsisionṇə' o šə cui nsa'achon, ca'atezəczən' cheyaḷə' so cuezcho. ²¹Šə nacle esclabo catə'ən gwlej Diozən' le'e par chonlilažə'əle Cristən', bito bi gaquele che de'enə'. Pero na' šə guatə' latjə chixjwle niçh əchojle xni'a xanlen', lechixjw niçh əchojle. ²²Na' la'anə'əczə nacle esclabo catə' Diozən' gwleje' le'e par chonlilažə'əle Xancho Cristən', nacle beṇə' zaque'e lao Xancho'. Na' la'anə'əczə cui naccho esclabo catə' Diozən' gwleje' chio'o par chonlilažə'əcho Cristən', pero na'a ža Cristən' banaque' Xancho. De'e nan' cheyaḷə' gwzenagcho che'. ²³Cristən' gwdixjue' xtolə'əchon' par niçh naccho xi'in Dioz. De'e na'anə' cheyaḷə' gwzenagəchcho che' cle ca gwzenagcho che bi de'en chesə'əna beṇə'. ²⁴Beṇə' bišə', šə nacle esclabo catə'ən gwlej Diozən' le'e par chonlilažə'əle Cristən', bito

bi gaquele. Guaquə so cuezle ca' na'a ngodə'əle Diozən' txen.

²⁵Bito bi mendad ben Xancho Cristən' can' goncho par len no'ol güego' ca'. Pero nada əṇia' le'e can' chacda' cheyaḷə' goncho par len lega'aque'. Na' laogüe de'en babeyašə' beži'ilažə' Xancho' nada' na' chaclene' nada' par chona' complir can' cheyaḷə' gona'anə', dižə' de'e nga cho'a naquən de'e zaque'e par əgwzenagle chei.

²⁶De'en chacda' nada', notə'əteza beṇə' šə nšagne'e catə'ən gwlej Diozən' le' par chonlilažə'e Cristən', con can' cheyaḷə' so cueze', o šə bito nšagne'e, leczə can' chacda' naquən güen so cueze'. Nia' ca' por ni che can' chi' saquə'əcho tyemp nga zocho na'a. ²⁷Le'e nšagna'ale bito yela'ale xo'olle, na' le'e cui no xo'olle zo, bito chiljle xo'olle. ²⁸Pero na' notə'ətezle bito gaple dolə' šə əgwšagna'ale, na' ni le'e no'ol güego' bito gaple dolə' šə əgwšagna'ale. Pero de'en gac chele de'e zan de'e chi' saquə'əle lao yežlyo ngan', lenṇə' cui che'enda' gac chele əṇia' ca'.

²⁹Beṇə' bišə', che'enda' nia' le'e de que bito socho zan iz par goncho xšin Diozən'. De'e na'anə' šə nitə' xo'olle, cheyaḷə' gwzenagle che Diozən' na' gonczle xšine'enə' can' gonlen žalə' cui no xo'olle zo. ³⁰Na' šə chegüine'echo por ni che bi de'en chac checho, cheyaḷə' soczcho goncho xšin Diozən' caczə chon beṇə' cui bi bi chac chei. Na' šə de de'en cheba chezaquə'əlažə'əcho, cheyaḷə' gonczcho xšin Diozən' can' goncho žalə' cui chac to de'e güen checho de'en goncho xbab

chei. Na' šə bagwxi'icho to de'e gwchincho, bito cheyalə' gonteccho xbab chei sino cheyalə' gonczcho xšin Diozən' can' goncho žalə' cui gwxi'ichon. ³¹Ca naquə zocho yežlyo nga na' chchincho bi de'e ca' de'en de yežlyo nga, bito cheyalə' cue'echgua yichjcho che bi de'en deicho o bi de'en chac checho chedə' de'e te chei yežlyo nga chle'icho na'a.

³²Na' che'enda' bito bi cuec yichjle che de'en chac yežlyo nga. Šə to beṇə' cui zo xo'ole', deczə latjə par gone' xbab che xšin Xancho Diozən' de'en chone', na' deczə latjə par güe'elažə'e gone' de'en yebei Xanchon'. ³³Pero šə to beṇə' zo xo'ole', chbe' yichje' che de'en chac yežlyo nga na' can' gone' par nič yebei xo'olen'. ³⁴Na' leczə nža' can' chac len no'olən' nšagna' na' no'olən' cui nšagna'. No'olən' cui nšagna' nlatje' par cue' yichje' che de'en chene'e Xancho Diozən' na' par gon cuine' lažə' ne'enə' nič gone' can' chene'e Diozən' len cuerp che'enə' na' len yichjla'ažda'ogüe'enə'. Pero no'olən' zo be'en chei, chbe' yichje' che de'en chac yežlyo nga na' nac gone' par yebei be'en che'enə'.

³⁵Bagwnia' le'e ca' par nič gaquəlenən le'e, caguə de'e əgwžona' əgwšagna'alənə'. Con che'enda' güe'elažə'əle par gonle de'e güen na' güe'elažə'əle par gonle xšin Xanchon' sin cui bi bi gwžon gonlen.

³⁶Na' šə to beṇə' chaquene' bito chone' güen ca de'en cui chšague' na' xi'ine' no'olən', na' šə no'olən' bangole' na' chene'ene' əgwšagne'e,

naquəczən güen gwšag xe'enə' ne'e šə can' chazlažə'e gone'. Bito chone' de'e mal šə əgwšague' na' xi'ine' no'olən' len ben' chṇab le' par gaque' xo'ole'. ³⁷Pero šə to beṇə' zoe' chaquene' chone' güen len xi'ine' no'olən' de'en bito chene'ene' no si' le', con šə cui chene'e xi'ine'en əgwšagne'e na' šə chaquene' cui de bichlə de'en chonən byen par əgwšagna' xi'ine'enə', de lsens par gone' can' chazlažə'e na' choncze' güen can' bagwchoglažə'e gone'. ³⁸Na' leczə chon ben' güen be'enə' chšague' na' xi'ine' no'olən', pero güen chon be'enə' cui chšague' na' xi'ine' no'olən'.

³⁹Na' ca naquə notə'ətezə no'olə ca' zjənšagna', cheyalə' yesə'ənite'e len be'en chega'aque' ca', chedə' can' chon lein' mendad. Pero šə sa'atclə be'en chega'aque' ca', guac yesyə'əque'e beṇə' yoblə, con šə beṇə' chso'onlilažə' Xancho Cristən'. ⁴⁰Pero chacda' nada' yesə'ənitə'əche' mbalaz šə yesyə'əga'əne' sin cui no yesyə'əque'e cle ca yesyə'əque'e beṇə' yoblə. Na' chacda' xbab chian' naquən tozə len xbab che Spirit che Diozən'.

Yełə' guao de'en choso'ožia beṇə' lao lgua'a lsaquə'ən chse'ejni'alažə'e

8 Balle nale bito cheyalə' gaocho yełə' guao de'en choso'ožia beṇə' lao lgua'a lsaquə'ən chse'ejni'alažə'e, na' yeballe nale bito gonən mal gaochon chedə' nezecho bito bi zjəzaquə' lgua'a lsaquə' ca'. Na' əchnia' le'e bito cheyalə'

gon cuincho xen laogüe de'en
 chaquecho lechgualē nezecho
 to de'en nezecho, sino cheyalā'
 gaquecho che yeziquā'achlā
 beṇā' chso'onlilažā' Cristān' na'
 gaquā'lenga'acchone'. ²Na' šā
 chaquecho lechgualē nezecho to
 de'en nezecho, cheyalā' gacbe'icho
 de que bito bi bi de de'en
 chejni'icho can' cheyalā' šejni'ichon.
³Pero šā chaquecho che Diozān',
 chebeine' chio'o.

⁴Na' ca naquā gwṇable šā guac
 gaocho yelā' guao de'en choso'ožia
 beṇā' lao lguā'a lsaquā'ən
 chse'ejni'alažē'enā', de'e liczā can'
 nalenā', lguā'a lsaquā' ca' caguā bi
 zjəzaquā'ən. Diozān' naquā Xāncho,
 na' le'enā' cheyalā' šejni'alažā'əcho.
⁵De'e zan de'e de yoban' na'
 yežlyon' de'en chse'ejni'alažā' beṇā'
 chāsə'əne' zjənaquān xāngā'aquē'.
⁶Pero chio'o nezecho tozā Xācho
 Dioz nan' zo na' tozā Xāncho
 Jesocristān' par güe'ela'ocho na'
 par güe'ega'acchone' yelā' bala'aṇ.
 Na' Xācho Dioz na'anā' bene' par
 niḥ Xāncho Jesocristān' bene'
 yoguā'əloḷ beṇā' na' yoguā' bia
 chsa'aš, na' yoguā' bichlā de'e zjəde.

⁷Balā beṇā' bišə'əcho bito
 chse'ejni'ine' ca de'en chejni'icho.
 Ne'e chsa'aquene' beṇā' zaquā'
 lguā'a lsaquā' ca', na' de'e na'anā'
 chsa'aquene' chso'one' de'e mal
 catā' chsa'ogüē' yelā' guao de'en
 choso'ožia beṇā' lao lguā'a lsaquā'ən
 chse'ejni'alažē'e, chedā' cuinā'
 se'ejni'išaogüē'ene' de que bitobi
 zjəzaquā' lguā'a lsaquā' ca'. ⁸Bitobi
 zaquā' yelā' guao' par niḥ Diozān'
 yebeichene' chio'o. Diozān' chebeine'
 chio'o caguā por ni che de'en

chaocho bitə'ətezə yelā' guaon' len
 caguā por ni che šā cui chaochon.
⁹Pero bito cheyalā' goncho par
 niḥ beṇā' ljuēžjcho ca' yesə'əxope'
 so'one' de'e mal laogüē de'en cuinā'
 se'ejni'iša'ogüē'ene' de que bitobi
 zjəzaquā' lguā'a lsaquā' ca'. ¹⁰Le'e
 nacle beṇā' chejni'i, na' šā cue'ele
 na' ye'ej gaole gan' chso'on beṇā' lṇi
 che lguā'a lsaquā', de repent no beṇā'
 chso'onlilažā' Jesocristān' yesə'əle'ine'
 le'e na' leczā se'enene' sa'ogüē' de'en
 choso'ožia beṇā' lao lguā'a lsaquā'ən
 chse'ejni'alažē'e. Na' balē' əsa'aquene'
 de que əsa'ape' dolā' šā sa'ogüē'en
 chedā' ne'e chsa'aquene' beṇā'
 zaquē'e lguā'a lsaquā' ca'. ¹¹Na' chio'o
 bachejni'icho de que bito bi zjəzaquā'
 lguā'a lsaquā' ca', bito cheyalā'
 goncho bitə'ətezə de'e gon par niḥ
 beṇā' bišə'əcho ca' cuich so'onlilažē'e
 Cristān' na' yesə'əbiayi'e. Cristān'
 bnežjw cuine' gwso'ot beṇā' le' lenczā
 por ni che beṇā' bišə'əcho ca' beṇā'
 ca' cuinā' se'ejni'išaogüē'e de que
 bito bi zjəzaquā' lguā'a lsaquā' ca'.
¹²Contr beṇā' bišə'əcho can' choncho
 šā choncho par niḥ sa'ogüē' de'en
 choso'ožia beṇā' lao lguā'a lsaquā'ən
 chse'ejni'alažē'enā'. Na' catā' choncho
 contr lega'aquē', leczā contr Crist
 nan' choncho, na' chapcho dolā'
 laogüē'enā'. ¹³De'e na'anā' nia' šā por
 ni che belā' de'en chaogua' gonān par
 niḥ beṇā' bišə'əcho ca' yesə'əxope'
 so'one' de'e mal, cuatəch gaogua'an
 par niḥ cui yesə'əxope' so'one' de'e
 malən'.

**Pabən' be'e dižə' de que
 naque' doalje apostol**

9 Nezele de que nada' naca'
 apostol, na' napa' yelā'

chnabia' par ania' naquən' gona'. Nezele de que bable'ida' Xancho Jeso'osən' na' de que chonlilažə'əlene' chedə' nada' be'elena' le'e dižə' güen dižə' cobə che'ena'. ²La'anə'əczə šə beṇə' ca' ye'la' bito chse'e'jele'e de que naca' apostol, pero le'e chejle'ele. Na' de'en chonlilažə'əle Xanchon' ben' bselə' nada' chl'ele de que de'e li naca' apostol che'ena'.

³De'e nga nia' chzoa' rson lao beṇə' ca' chəsə'əne' cui bselə' Diozən' nada' par naca' apostol. ⁴Nada' napa' ye'la' chnabia' par naba' gonle nada' mantener žalə' ye'enda' gonle ca'. ⁵Deczə lsens par əgwšagna'a len no'olə chonlilažə' Cristən'. Na' žalə' gwšagna'a deczə lsens par əchi'ane' con ga š'a, can' chon Bedən' na' apostol ca' ye'la' na' beṇə' ca' zjənaquə bišə' Xancho Jesocristən'. ⁶Zaquə'əczə Bernaben' na' nada' par cuich gonto' žin len ni'a na'ato' nič gonle neto' mantener žalə' ca', la' yeziquə'əchlə beṇə' ca' choso'osed choso'olo'i xtižə' Diozən' bito chso'one' žin len ni'ana'aga'aque'. ⁷Ca' naquə soldad bito chyixjue' che gast che'ena' sino que nitə'əczə beṇə' chəsə'əyixjw len. Na' notono gazə zan yag oban' šə cui gaogüe' frot dao' chein' catə' yesə'əbian, na' nic no əgwye xonj baquə' šə cui ye'je' lata' lech chebən'. ⁸Ca' de'en nia' ca' bito naquən xbab che beṇəch, sino leczə can' na lei de'en bzoj de'e Moisezən'. ⁹Quinga bzoje' le'e lein': "Bito əgwseyjwle cho'a go'on ca' žlac choso'olej choso'ošəjəb trigon' par chchoj xeinə'." Caguə por ni che de'en chi'

yichj Diozən' go'on ca'azən' bene' mendad par bzoj de'e Moisezən' ca'. ¹⁰Chzejni'ine' chio'o de que naquəczən güen goncho mantener beṇə' ca' chso'on xšin Diozən' entr chio'o, na' leczə de'e na'anə' nyojən de que ben' chgua'an go'on na' ben' chonšao' trigw cheyalə' yesə'əzi'e latə' güejə cwseš che de'en chso'one'. ¹¹Bəch goclento' le'e par nič chejni'ile xtižə' Diozən' na' de'e na'anə' bito naquən mazəchlə de'en cheyalə' gonle žalə' nabto' gonle neto' mantener. ¹²Chonle mantener yeziquə'əchlə beṇə' choso'osed choso'olo'ine' le'e na' neto' zaquə'əchto' par gonle neto' mantener cle ca' lega'aque'.

Pero bito chnabto' gonle neto' mantener. Chgo'o chchejlažə'əto' bitə'ətezə de'en chac cheto' par nič cui bi bi gwžon šanch chio'o chzenagcho che dižə' güen dižə' cobə che Cristən'. ¹³Ca'aczən' chac len beṇə' ca' chso'on mendad lo'lo yo'odao' əblao che neto' beṇə' Izrael, chsa'aque' mantener len de'en chəsə'ənežjo beṇə' Izrael ca' lega'aque'. Na' bxož ca' choso'ozey bia yixə' par chso'elaogüe'e Diozən', chosyo'ocua'ane' latə' güejə de'e chsa'ogüe' che bia ca' chso'ote'ena'. ¹⁴Na' ca'aczən' baben Xancho Jesocristən' mendad de que beṇə' ca' choso'ozenag che dižə' güen dižə' cobə che'ena' cheyalə' so'one' mantener beṇə' ca' chəsə'əyixjui'en len lega'aque'. ¹⁵Pero nada' ža, bitonə' naba' gonle nada' mantener, na' caguə chzoja' de'e nga na'a par nič gonle ca'. Yebeichləda' gata' caguə ca naba' gonle nada' mantener, chedə'

lechguale chebeida' can' guac ənia' de que bito bi bi gan chona' de'en əchyixjui'a dižə' güen dižə' cobə che Jesocristən' len le'e.

¹⁶Bito gaquə ənia' de que to goclen xennə' chona' laogüe de'en chyixjue'ida' beṇə' dižə' güen dižə' cobə che Jesocristən'. Diozən' gwleje' nada' par chyixjui'an na' chonən byen gona' con can' ne'ənə', na' probchguazə nada' žalə' cui chzenaga' par chixjui'a dižə' güen dižə' cobə che'ənə'. ¹⁷Žalə' chyixjui'an por ni che de'en na xbab chia'an gona' ca', naba' gonle nada' mantener. Pero bito ənacho de que naquən xbab chia' gona' ca'. Diozən' gwleje' nada' par əchyixjui'an na' de'e na'anə' cheyalə' chixjui'an.

¹⁸Na' cheba chezaquə'əlažə'a de'en cui chṇaba' gonle nada' mantener ca de'en chyixjui'a dižə' güen dižə' cobə che Jesocristən' len le'e. Bitobi laxjua' chzi'a ca de'en chyixjui'an, la'anə'əczə zaca'a par gonle nada' mantener.

¹⁹Chzəxjw yichja' chon cuina' ca xmos yoguə'əlol beṇə' par niç šanch beṇə' so'onlilažə' Cristən', la'anə'əczə Diozən' none' nada' beṇə' gwnabia'. ²⁰Catə' zoa' len beṇə' Izrael ca' chona' con can' chon neto' beṇə' Izrael na' lecə chona' yoguə' de'e ca' zjənyoj le'e lei de'en bzoj de'e Moizezən', la'anə'əczə nezdə' bito chyažjən gona' ca' par niç yebei Diozən' nada'. Pero naogua' costombr ca' par niç ca' lega'aque' yoso'ozenague' chia' na' so'onlilažə'e Cristən'. ²¹Na' catə' zoa' len beṇə' cui zjənombia' lei de'en bzoj de'e Moizezən' bito

naogua' costombr ca' de'en chon lein' mendad naoto', par niç ca' beṇə' ca' cui zjənombia' lei de'en bzoj de'e Moizezən' yoso'ozenague' chia' na' so'onlilažə'e Cristən'. Bito nacho cui chzenaga' che lei che Diozən', chedə' la' zoa' chzenaga' che Cristən'. ²²Catə' zoa' len beṇə' cuiṇə' se'ejni'išaogüe'ene' can' chene'e Diozən' goncho, bito chona' de'e sa'aque'ne' zjənaquən de'e mal goncho la'anə'əczə nezdə' bito zjənaquən mal. Chi' yichja' naclə gona' par niç yoso'ozenague' chia' na' so'onlilažə'əche' Cristən'. Chona' xte gan' zelao chzaquə'əda' par chaquə'lena' yoguə'əlol beṇə' par niç ca' šə bale' so'onlilažə'e Cristən'. ²³Yoguə'əlol de'en chona', chona'an par niç se'ejle' beṇə' dižə' güen dižə' cobə che Cristən', chedə' la' che'enda' šancho na' txen socho mbalaz.

²⁴Nezecho catə' beṇə' chso'one' carrer yogue'e chsa'acdoe' par niç chatə'əbia' noe' chon gan, na' tozə ben' chon gan chzi'e premio. Pero na' chio'o, to tocho cheyalə' güe'elažə'əcho goncho cayanə'an chene'e Diozən' par niç ca' gaquə gone' ca so to tocho mbalaz catə'an yežincho gan' zoe'ənə'. ²⁵Beṇə' deportist ca' chəsə'əgo'o chəsə'əchejlažə'e cui chso'one' con can' na cuerp chega'aque'ənə' par niç chsa'aque'che' beṇə' gual. Chso'one' ca' chedə' chse'enenə' so'one' competir na' yesə'əzi'e to premio, la'anə'əczə naquən to premio de'e te chei. Na' chio'o bito cheyalə' güe'echo latjə nabia' la'ažda'omalchon' chio'o par niç Diozən' gone' ca socho mbalaz

catə' yežincho gan' zoe'enə'. Na' premio de'en gon̄ Diozən' chio'o caguə de'e te chein'. ²⁶Ca naquə beṇə' deportist ca', la'anə'əczə šə chsa'acdoe', bito so'one' gan' šə cui zjəneze' ga zelao yesə'əžine'. Na' šə beṇə' chso'one' bocsear, cheyaḷə' yesə'əneze' nac yoso'ochitje' ponetən' par niçh so'one' gan. Na' nada' gwxaquə'əlebəda' ca to deportist beṇə' chacchgua laogüe de'en chona' do yichj do laža'a yoguə'əḷəḷ can' na Diozən'. ²⁷Na' bito chzenaga' che la'ažda'omala'an bitə'ətezə de'e mal de'en nan gona' len cuerp chia'anə'. Žalə' chzenaga' che la'ažda'omala'an bito yebei Diozən' nada' la'anə'əczə bagwdixjui'a dižə' güen dižə' cobə che Jesocristən' len beṇə' yoblə.

Bito cheyaḷə' goncho txen len beṇə' ca' chse'ejni'alažə' lgu'a'a lsaquə'

10 Beṇə' bišə', che'enda' ənezele de que Diozən' gwzoe' len yoguə'əḷəḷ de'e xaxtao' neto' beṇə' Izrael, beṇə' ca' besya'əchoj Egipton'. Yogue'e jəsə'ənaogüe bejon' gan' yo'o Diozən' na' yogue'e gosə'ədie' Nisdao' Exnan' lao goquən choplə par bla' yo biž. ²Na' yoguə'əḷəḷe' gwsa'aque' txen len de'e Moisezən' ca de'en gwche'e lega'aque' gosə'ədie' nisdə'onə' na' gatə'ətezəchlə ja'aque' bedote gwzo Diozən' len lega'aque' lo'o bejon'. ³Na' yoguə'əḷəḷ de'e xaxta'oto' ca' gwsa'ogüe' tozə clas yelə' guao de'en bnežjw Diozən' lega'aque'. ⁴Na' yogue'e tozə nis de'en bnežjw Diozən' lega'aque' gwse'eje'. Na' Cristən' gwxaquə'əlebene' ca yejən'

gan' bchoj nisən' de'en gwse'eje', chedə' Cristən' gwdalene' beṇə' ca' na' goclene' lega'aque'. ⁵Na' la'anə'əczə Diozən' bene' güen len yogue'e con to chopgue' gwsə'one' can' chazlažə' Diozən', na' de'e na'anə' Diozən' bene' par niçh gosə'əbiayi' beṇə' ca' yelə' latjə dašən'.

⁶Beṇə' ca' gosə'əzelaže'e gatə' bi de'e gatə' chega'aque' de'en cui gone'e Diozən' gwnežjue' lega'aque'. Na' de'en goc chega'aque' chzejni'in chio'o de que bito cheyaḷə' selažə'əcho goncho bi de'en naquə de'e mal. ⁷Bito cheyaḷə' šejni'alažə'əcho lgu'a'a lsaquə' nic bitə'ətezəchlə de'en chse'ejni'alažə' beṇə' ca' cui zjənombia' Diozən'. Zan beṇə' Izrael ca' gwse'ejni'alaže'e lgu'a'a lsaquə' na' nyoj Xtižə' Diozən' cho'en dižə' can' gwsə'one' lao lgu'a'a lsaquə' go'on̄ dao' bian' gwse'ejni'alaže'e, nan: "Gosə'əbi'e gwse'ej gwsa'ogüe' na' gosə'ənite'e gwsə'one' legr." ⁸Na' leczə ca' bito cheyaḷə' co'o xtocho o goncho bichlə de'e yelə' zto' de'en nac ca'. To ža zan beṇə' Izrael ca' boso'oža' xtoga'aque', na' lao ža na' gwsa'at šonechoa milga'aque'. ⁹Bito cheyaḷə' goncho Xancho Diozən' prueb šə leine' can' ne'lenə'. Zan beṇə' Izrael ca' gwsə'onene' prueb šə leine' can' ne'lenə', na' Diozən' bsele'e beḷ əznia gwsa'ob lega'aque' na' zane' gwsa'at. ¹⁰Zan beṇə' Izrael ca' besə'əže'eše'e len Diozən'. De'e na'anə' Diozən' bsele'e to angl bete' lega'aque'. Na' chio'o ža bito cheyaḷə' əže'ešə'əcho len Diozən'. ¹¹Yoguə' de'e ca' goc chega'aque' zjənyojən par chəsə'əzejni'in

naquən' cheyalə' gon chio'o zochō tyemp nga babidə Xāncho Jesocristən'. ¹²De'e na'anə' notə'ətezcho šə chaquecho zochō chonlilažə'əcho Jesocristən', cheyalə' gapcho cuidad par niçh cui goncho de'e malən'. ¹³Bitə'əteza de'e mal de'en chgo'oyelə' gwxiye'en chio'o goncho, bito n̄acho zdebəchlə chac checho cle ca che notə'ətezəchlə beṇə'. Na' Diozən' zocze' chaclene' chio'o can' ne'enə'. Chone' chio'o fuers balor par niçh cui gwzenagcho che gwxiye'enə', na' chzejni'ine' chio'o naquən' goncho par niçh soicho cui goncho de'e malən'.

¹⁴De'e na'anə' xi'indaogua'a, bito gonle txen len beṇə' ca' chse'ejni'alažə' lgu'a' lsaquə'. ¹⁵Bachejni'ile. De'e na'anə' legon xbab che de'e quinga chzejni'ida' le'e par niçh ənezele de que chona' le'e to consejw güen. ¹⁶Na' ca naquə de'en che'ej chaocho par chjəyeza'alažə'əcho bi zejen par chio'o de'en gwso'ote' Cristən', yelə' choxcwlen che Dioz nan' cho'echo catə'ən che'ej chaochon. Na' ca de'en che'ej chaochon' zejen de que chio'o chonlilažə'əcho Cristən' naccho tozə, chedə' Crist na'anə' bnežjw cuine' gwso'ote'ene' na' blalj xchene'enə' par gwdixjue' xtolə'əchon'. ¹⁷Tozə yetxtilən' chzoxjcho na' yoguə'əcho chaocho latə' güejən par chjəyeza'alažə'əcho bi zejen de'en gwso'ote' Cristən'. La'anə'əczə naccho beṇə' zan, de'en chao yoguə'əcho tozə yetxtilən' chlo'en de que yoguə' chio'o chonlilažə'əcho Cristən' naccho ca tozə family laogüe de'en ngodə'əcho txen len le'.

¹⁸Na' legon xbab che de'e nga. Beṇə' Izrael gwlaž ch̄ia' ca' catə' chso'ela'ogüe'e Diozən' chso'ote' bia yixə' to lao mes de'en naquə par Diozən'. Na' balteza beṇə' chsa'ogüe' xpelə' bian' chso'ote' lao mesən' naquəga'aque' txen chso'elaogüe'e Diozən'. ¹⁹Na' ca'aczən' naquən len chio'o, šə gaocho yelə' guao de'en choso'ožia beṇə' lao lgu'a' lsaquə'ən chse'ejni'alažə'enə', so'one' xbab de que zochō lez gaquəlen lgu'a' lsaquə' ca' chio'onə'. Bitō əṇacho de que lgu'a' lsaquə' ca' zjəzaquə'ən par əsa'aclenən beṇə', na' nic bi zaquə' ca de'en chjəsə'əžie' yelə' guaon' laoga'aquen'. ²⁰Che'enda' ənezele de que beṇə' ca' cui zjənombia' Diozən' catə' chjəsə'əžie' yelə' guaon' lao lgu'a' lsaquə'ən chse'ejni'alažə'enə', caguə par Dioz na'anə' chjəsə'əžie'en, sino par de'e xio' ca'anə'. Na' bito che'enda' gonlenle de'e xio' ca' txen. ²¹Bitō cheyalə' ye'ej gaocho de'en che'ej chaocho par chjəyeza'alažə'əcho bi zejen par chio'o de'en gwso'ot beṇə' Xāncho Cristən' šə leczə ye'ej gaocho de'en chjəsə'əžia beṇə' par de'e xio' ca'. ²²Contr Dioz nan' choncho šə che'ej chaocho de'en chjəsə'əžia beṇə' par de'e xio' ca', na' šə che'ej chaochon choncho ca chža'a Diozən' chio'o. Na' bito əṇacho naquəchcho beṇə' gualəch cle ca Diozən' par niçh cui bi gac checho šə goncho contr le'.

**Bitō goncho de'en naquə
mal par ljuējzcho**

²³Na' la'anə'əczə chəsə'əne':
“De lsens par goncho bitə'əteza”,
cheyalə' žjəsə'alažə'əcho de que
caguə yoguə' de'en gonchon'

naquən güen par chio'o. Na' la'anə'əczə šə chaquecho deczə lsens par goncho bitə'ətezə, caguə yoguə'ənnə' gaquəlenən chio'o. ²⁴Ni tocho bito cheyalə' goncho bitə'ətezə de'en goncho šə naquən mal par ljuežjcho, la'anə'əczə chaquecho naquən to de'e güen par chio'o.

²⁵Bitə'ətezə belə' de'en chso'ote'e ya'anə' legaon sin cui ənable šə bosos'ožie'en lao lgu'a' lsaquə'an chse'ejni'alaž'e. Nia' ca' par ničh cui gaquəžejlažə'əle šə nable dolə' por ni che de'en gaolen. ²⁶Nezecho de que guac si'icho bitə'ətezə belə' de'en chso'ote'e ya'anə', chedə' Xtižə' Diozən' nyojən nan: "Che Xancho Diozən' yežlyo nga, benəchən', bia yixə' na' yoguə' de'e zjəde lao yežlyon'."

²⁷Na' catə' beņə' cui chso'onlilažə' Cristən' so'one' chio'o combid ližga'aque'enə' par əxjtaocho, šə šejcho con gaotezcho bitə'ətezə de'en so'one' gaocho. Bitə' ənabga'aquechone' šə bosos'ožie'en lao lgu'a' lsaquə'an chse'ejni'alaž'e'enə'. Diozən' bito chene'ene' gaquəžejlažə'əcho šə napcho dolə' por ni che šə bi de'en gaocho. ²⁸Na' šə no ye' chio'o de que baboso'ožie' belə'an to lao lgu'a' lsaquə'an chse'ejni'alaž'e, bito gaochon šə ca' par ničh be'en ye' chio'o ca' cui gone' xbab de que lenczchon' chejni'alažə'əcho lgu'a' lsaquə' ca' na' par ničh cui gone' xbab de que napcho dolə' šə gaochon. ²⁹Bitə' ənacho de que naquən de'e mal gaochon, pero par ničh ben' gwna chio'o de que baboso'ožie'en lao lgu'a' lsaquə'an

cui gaquene' de que choncho de'e mal, de'e na'anə' cui gaochon.

De repent chonle xbab bixchen' cheyalə' cuejyichjcho cui goncho bitə'ətezə de'en goncho šə por ni che de'en gonchon' əsa'aque beņə' ljuežjchon' de que napcho dolə'. ³⁰Na' de repent chonle xbab bixchen' əna ljuežjchon' choncho de'e mal chaocho to yelə' guao šə cho'echo yelə' choxcwlen che Diozən' por len. ³¹Quinga naquən, bitə'ətezə de'en goncho cheyalə' gonchon ca gaquəlenən beņə' yoblə par ničh əso'elaogüe'e Diozən', na' bito ye'ej gaocho de'en gonən par ničh beņə' yoblə cui əso'elaogüe'e Diozən'. ³²Na' bito goncho par ničh notə'ətezə beņə' yesə'əxope' so'one' de'e malən', la'anə'əczə šə beņə' Izrael, o šə beņə' cui zjənaquə beņə' Izrael, na' la'anə'əczə naque' ljuežj chio'o bagwlej Diozən' par chdopə chžagcho cho'ela'ocho Cristən' o šə cui naque'. ³³Ca'aczə nada' ža, bitə'ətezə de'en chona' əchyiljəlažə'a naclən' chona'an par ničh gaquəlenən beņə' yoblə. Choncha' xbab che de'en gaquəlen nada', chedə' che'enda' beņə' zan yesyə'əchoj xni'a de'e malən'.

11 Nada' ža chchojyichja' de'en che'enda' gona' par ničh chona' de'en naquə güen par beņə' yeziquə'əchlə. Na' legonšga ca' chedə' nada' chona' can' ben Cristən'.

Can' cheyalə' so'on no'ol
ca' lao coltən'

²Lechgualə chebeida' de que chonle xbab chia' yoguə' las na'

de que chjsa'alažə'əle de'en bsd blo'ida' le'e. Güenchguan' chonle chzenagle che de'e ca' bsd blo'ida' le'e. ³Na' che'enda' ənezele de que notə'ətezə beṇə' byo cheyalə' əgwzəxjw yichje' par niç Cristən' nabi'ene'. Na' no'ol ca' cheyalə' yesə'əzəxjw yichjga'aque' par niç be'en chega'aque' ca' yesə'anabi'e lega'aque', can' chon Cristən' chzəxjw yichje' par niç Diozən' chnabi'ene'. ⁴Le'e beṇə' byo catə' gonle orasyon na' catə' chixjue'ele bi de'en bagwna Diozən' le'e, bito gwzo xlapə'əlen'. La' šə nzotezlen naquən to yelə' zto' par le'e na' zejen de que beṇə'əchən' chnabi'e le'e, caguə Crist na'azən'. ⁵Na' le'e no'olə catə' gonle orasyon o catə' chixjue'ele bi de'en bagwna Diozən' le'e, le'e gwcuašə' yichjle can' chonczle batə'ətezə chchojle niç nacbia' de que beṇə' byo ca' chəsə'anabi'e le'e. Yoguə'əcho nezecho naquən to yelə' zto' che no'olən' catə'an nšib yichje'en pelon, na' ca'aczə naquən len le'e no'olə šə cui chcuəšə' yichjlen' catə'an chonle orasyon o catə'an chyixjue'ele bi de'en bagwna Diozən' le'e. ⁶Na' šə cui chonle can' naquə costombr chele de'en chcuəšə' yichjlen' batə'ətezə chchojle, yejni'a əgwšib yichjlen'. Na' šə chaquele zto' par əgwšiblen, mejor əgwcuəšə'əczlen can' chso'on no'ol ca' yelə'. ⁷Na' ca naquə le'e beṇə' byo, bito cheyalə' əgwcuəšə' yichjlen' catə' gonle orasyon na' catə' chixjue'ele bi de'en bagwna Diozən' le'e, chedə' Diozən' bene' le'e par niç naple yelə' chnabi'a can' napə le'enə' na' par əgwlo'ele

ca güennə' chone'enə'. Na' le'e no'olə, Diozən' bene' le'e par əgwlo'ele ca güennə' chso'on be'en chelen'. ⁸Diozən' bito bene' beṇə' byon' len costiy che no'olən' sino que gwleje' costiy che beṇə' nechən' par bene'en no'olən'. ⁹Na' Diozən' bito bene' beṇə' byon' par gaquəlene' no'olən' sino que bene' no'olən' par gaquəlene' beṇə' byon'. ¹⁰De'e na'anə' no'ol ca' cheyalə' yesə'əlo'e de que chəsə'anabi'a beṇə' byo ca' lega'aque'. Cheyalə' so'one' ca' chedə' angl ca' chəsə'əgüie' naquən' chon chio'o beṇə'əch. ¹¹Pero ngodə'əczcho txen len Xancho Jesocristən' la'anə'əczə šə naccho beṇə' byo o šə naccho no'olə, na' de'e na'anə' bito cheyalə' so'on no'olə ca' xbab de que bito chəsə'əyažjene' beṇə' byo na' nic neto' beṇə' byo gonto' xbab de que bito chyažjeto' no'olə. ¹²Naquən de'e li can' ben Diozən' gwleje' costiy che beṇə' byo nechən' par bene'en no'olə nechən', na' nezecho yoguə'əte beṇə' byo gwxa'n no'olə lega'aque'. Na' Dioz na'anə' bene' beṇə'əch, bene' bia ca' chsa'aš, na' bene' bitə'ətezəchlə de'e zjəde. ¹³Legon xbab chele na' gacbe'ile de que caguə de'e šo'olažə'əcho šə no no'olə gone' orasyon sin cui əgwcuəšə' yichje'enə', chedə' can' naquə costombr chechon'. ¹⁴Na' leczə nezecho bito chazlazə'əcho šə beṇə' byon' cui əgwšib yichje'enə', con güe'e latjə ətonən. Naquən to yelə' zto' che' šə gone' ca'. ¹⁵Pero na' no'olən' xochechgua yišə' yichje'en šə žian de'e tonə. Diozən' none' par niç yišə' yichj no'ol ca' chaquən de'e tonə par chcuəšə'an

yichjga'aque'enə'. ¹⁶Na' šə nole bito chazlažə'əle de'e quinga babzoja' na' šə chaquele əgwšašle chei, ənia' le'e clar de que neto' apostol bito cho'eto' latjə so'on no'ol ca' orasyon lao ndopə nžagcho sin cui yoso'ocuašə' yichjga'aque'enə', na' nic chsoe' beṇə' ljuēžjto' ca' latjə so'one' ca' gatə'ətezəchlə ža' beṇə' bagwlej Diozən' par chəsə'ədopə chəsə'əžague' chso'elaogü'e Cristən'.

**Catə'ən gwse'ej gwsa'ogü'e
txen bito jəsyə'əza'alažə'e
can' bnežjw cuin Xancho
Jesocristən' por ni čhega'aque'**

¹⁷Leczə de de'e yoblə de'en ənia' le'e na' ca naquə lenṇə' bito gaquə ənia' de que chonle güen. De'en chonle lao chdopə chžagle txen par cho'ela'ole Cristən' chonən mal len le'e lguə'a de'e gaquəlenən le'e. ¹⁸Enia' ca' čhedə' babenda' dižə' de que catə' chdopə chžagle par cho'ela'ole Cristən' bito chonle txen len beṇə' ljuēžjle. Na' de repent dižə' de'en babenda' naquən de'e li. ¹⁹De'e li ṇitə' balə beṇə' entr le'e cui chso'one' txen len yoguə'əle. Na' de'en cui chso'one' txen chlo'e'en non' chonlilažə' Cristən' do yichj do lažə'e na' non' cui. ²⁰Na' catə' chežagle par chaole txen, bito chonle ca žjəyeza'alažə'əle de'en bnežjw cuin Xancho Jesocristən' por ni čhecho catə'ən gwso'ote'ene', la'anə'əczə chedopə chežagle par žjəyeza'alažə'əlen. ²¹To tole che'ej chaole de'en noxə'əle sin cui chbezə ljuēžjle ca'. Bito chonlen tozə par ničh yoguə'əle gaolen. De'e na'anə' balle ne'e chdonle catə' chedaole

na' yeballe chzožele de'e tant che'ej chaoxatle. ²²Nca'alə xneze yega'an ližle ye'ej gaole cle ca ye'ej gaole lao beṇə' cui de čhega'aque' šə cui əgwnežjwle čhega'aque'. Chonga'aquele ljuēžjle ca beṇə' cui bi zjəzaquə', la'anə'əczə txen len chio'o bagwlej Diozən' lega'aque' par chso'elaogü'e'e Jesocristən': Chonle ca chsa'aquene' tolə de'en cui de čhega'aque'. Bito gonle xbab ənia' de que güenṇə' chonle de'en chonle ca'.

**Che'ej chaocho par
čjəyeza'alažə'əcho de'en
bnežjw cuin Xancho
Jesocristən' por ni čhecho**

²³Xancho Jeso'osən' bene' par ničh nezdə' can' chene'ene' goncho par žjəyeza'alažə'əcho de'en bnežjw cuine' por ni čhecho catə'ən gwso'ote'ene'. Na' babzejni'ida' le'e de que že'enə' catə'ən Jodən' bdie' Xancho Jeso'osən' lao na' beṇə' mal ca', Xancho na'anə' bexe'e to yetxtilən'. ²⁴Na' lao noxe'en be'e yelə' choxcwlen čhe Diozən'. Nach bzojje'en, na' gwne': "Legao yetxtil nga. Lenṇə' naquən cuerp čhia' de'en əgwnežjua' por ni čhele. Quinga gonle par žjəyeza'alažə'əle ca de'en gwnežjua'an." ²⁵Beyož gwsa'ogü'e yetxtilən' bexe'e to tas nis oban' na' leczə be'e yelə' choxcwlen čhe Diozən'. Na' gože' beṇə' ca': "De'en yožə lo'o tas nga zejen de que Diozən' solao gone' de'e cobə de'en none' lyebe gone' par gaquəlene' le'e. Na' gone'en čhedə' so'ote' nada' na' laljə xčhena'anə' por ni čhele. Na' batə'ətezə ye'ejlen can' ye'ejlen

na'a, le'e yosa'alažə' ca de'e gwnežjo cuina' por ni chele." ²⁶Na' nada' Pab cheznia' le'e, yoguə' las catə'an gaocho yetxtilən' na' catə'an ye'ejcho nis oban' de'en che'ej chaocho par chjəyeza'alažə'əcho ca de'en bnežjw cuin Xancho Jesocristən' por ni checho, choncho ca yesə'əneze beṇə' de que gwɔdixjue' xtołə'əchon' catə'an gwso'ote'ene'. Na' can' gonchcho xte catə'an yide' de'e yoblə.

Can' cheyalə' goncho catə' che'ej chaocho par chjəyeza'alažə'əcho de'en bnežjw cuin Xancho Jesocristən' por ni checho

²⁷De'e na'anə' šə bito güe'ela'ocho Xancho Jesocristən' do yichj do lažə'əcho bito naquən güen ye'ej gaocho de'en che'ej chaocho par chjəyeza'alažə'əcho ca de'en bnežjw cuin Xancho Jesocristən' por ni checho. Na' leczə bito naquən güen ye'ej gaochon catə' cui zocho binlo len Diozən' o len ljuējzjcho. Gapcho dolə' šə ye'ej gaochon ca', chedə' goncho ca cui bi zaquə' de'en bnežjw cuin Xancho Jesocristən' blalj xchene'enə' por ni checho. ²⁸Catə'an che'ej chaocho par chjəyeza'alažə'əcho ca de'en bnežjw cuin Xancho Jesocristən' por ni checho, to tocho cheyalə' gonyanə'əcho xbab šə zocho binlo len Diozən' na' len ljuējzjcho ca' par nič ye'ej gaocho de'en de ye'ej gaocho. ²⁹Na' šə che'ej chaochon sin cui goncho xbab ca de'en bnežjw cuin Xancho' por ni checho Diozən' gone' chio'o castigw. ³⁰Na' de'en che'ej chaolen sin cui chonle xbab bi zejen, de'en na'anə'

balə beṇə' ljuējzjlen' bagwsa'at na' zanle chacšene. ³¹Pero na' šə gonyanə'əcho xbab naquən' goncho par nič socho binlo len Diozən' na' len ljuējzjcho, nachən' bito gon Diozən' chio'o castigw por ni che can' che'ej chaochon'. ³²Catə' napcho dolə' na' che'ej chaochon, Xancho Diozən' chone' chio'o castigw par nič cheyabe'icho de que de'e malən' choncho. Chone' ca' par nič cui si'icho castigw zejlicane can' gac che beṇə' ca' cui chso'elao' le'.

³³De'e na'anə' beṇə' bišə', catə' ədopə əžagle txen par ye'ej gaole, lecuezə ljuējzjle ca' par nič ye'ej gao yoguə'əle txen. ³⁴Šə de'en chbil chdonle na'azə, nca'alə xneze yega'an ližle ye'ej gaole, caguə ca gon Diozən' le'e castigw can' chonle catə'an chdopə chžagle. Na' ne'e deczə de'en che'enda' gwzejni'ida' le'e naquən' gonle, pero catə' yida' de'e yoblə gan' zolenə' cana'ach əgwzejni'ida' le'e che de'e ca'.

Spirit che Diozən' chaclenən to tocho par goncho bi de'en chene'en goncho

12 Beṇə' bišə', de de'en che'enda' ənezele che de'en chon Spirit che Diozən' chaclenən chio'o chonlilažə'əcho Jesocristən'.

²Nezele catə'an cuinə' gombi'ale Diozən' banxoayagle par chejni'alažə'əle lgu'a' lsaquə' ca' con can' bzejni'i beṇə' le'e, la'anə'əczə lgu'a' lsaquə' ca' bito zjənye'en biš xne. ³Pero na'a ža, che'enda' ənezele de que Spirit che Diozən' bito chonən par nič no əṇa de que Jeso'osən' naque' beṇə' maldit. Na' notono no əṇa de que

Jeso'osən' naque' Xane' šə cui chon Spirit che Diozən' par əne' ca'.

⁴Tozə Spirit che Diozən' zon na' nža' nža' can' chaclenən to tocho par goncho bi de'en goncho na' par ənezecho bi de'en nezecho. ⁵Tozə Xancho Jesocristən' cho'ela'ocho la'əṇə'əczə nža' nža' can' chac gon to tocho xšine'enə'. ⁶Lezczə tozə Dioz nan' zo la'əṇə'əczə nža' nža' can' chone' len to tocho par niçh choncho xšine'enə'. ⁷Na' Spirit che Diozən' zon len to tocho par niçh ca' chac choncho de'en chaclenən ljuežjcho. ⁸Spirit che Diozən' chonən par niçh balcho cho'echo dižə' che Diozən' de'en naquən lechguale dižə' sin', na' lezczə Spirit na'anə' chaclenən yebałcho par chejni'icho che Diozən' na' par cho'echo xtiže'enə'. ⁹Na' Spirit na'anə' chonən ca balcho chonjilažə'əchguacho Diozən' par niçh chac bitə'ətezə de'en chṇabechone' gaquə. Na' lezczə Spirit na'anə' chonən par niçh balcho chac choncho ca chəsyə'əyaque beṇə' chsa'acšene. ¹⁰Na' Spiritən' chonən par niçh balcho choncho miłagr, na' balcho chyixjue'echo bi de'en bagwna Diozən' chio'o. Na' lezczə Spirit nan' chaclenən yebałcho par niçh chnezecho che bitə'ətezə de'en chso'on beṇə' šə za'an che Spirit che Diozən' o šə che de'e xio'onə'. Na' Spirit na'acžən' chaclenən yebałcho par chchoj catə' cho'echo gwde gwdełə dižə' de'en cui chejni'icho, na' chaclenən yebałcho par chozejni'iga'aquechone' bi zeje dižə' de'en cho'echon'. ¹¹Tozə Spiritən' chaclenən yoguə'əcho

par niçh choncho yoguə' de'e ca' chene'en gon to tocho.

**Yoguə' chio'o chonjilažə'əcho
Cristən' naccho tozə, can'
naquə cuerp chechon'**

¹²Cuerp chechon' nsa'an zan part pero de'en zjəngodə'ən txen naquən tozə cuerp. Ca'acžə naquən len yoguə' chio'o chonjilažə'əcho Cristən', naccho tozə can' naquə cuerp chechon'. ¹³Balə chio'o naccho beṇə' Izrael na' yebałcho bito naccho beṇə' Izrael. Balcho naccho beṇə' esclabos na' yebałcho bito naccho. Pero yoguə'əcho gwchoacho nis par chlo'en de que Spirit che Diozən' babenən ca ngodə'əcho txen len Cristən'. Na' tozə Spirit na'anə' zon lo'o yichjla'aždao' yoguə'əcho.

¹⁴Cuerp chechon' nsa'an zan part, na' nža' naquə to to partən'. ¹⁵Žalə' ni'achon' əṇan: "Bito naca' tozə len cuerpən' chedə' bito naca' ne'inə'", caguə ni che de'en əṇan ca'anə' cui naquən tozə len cuerpən'. ¹⁶Le'egatezə ca' žalə' nagchon' əṇan: "Bito naca' nada' tozə len cuerpən' chedə' bito naca' jelaogüei." ¹⁷Žalə' doxen cuerp chechon' naquən jelaochi, bito gaquə yenecho. Le'egatezə ca' žalə' doxen cuerpən' naquən nagcho, bito gaquə le'icho. ¹⁸Pero Diozən' bsi'e xneze par niçh cuerp chechon' nsa'an zan part de'e chso'on žin con can' gwyazlaže'e. ¹⁹Bito nya' cuerp chechon' žalə' nsa'an tozə part. ²⁰Cuerp chechon' nsa'an zan part pero de'en zjəngodə'ən txen naquən tozə cuerp. ²¹De'e na'anə' jelaochon' bito gaquə ye'en na'achon': "Bito

chyažjda' le'." Na' nic gaquə ye' yichjchon' ni'achon': "Bito chyažjda' le'." ²²La'anə'əczə cuerp chechon' nsa'an balə part de'e cuitec bi fuers chei de, bia'aczə lechguale chyažjchon. ²³Na' part ca' nsa' cuerp chechon' de'en chaquecho cuitec bi zaquə', chi' yichjchon ca de'en cheyacw xacho. Na' part ca' de'e cui chene'echo le'i beṇə', chcuasə'əchon len xacho de'en chacwcho. ²⁴Pero part de'en nsa' cuerp chechon' de'en banaquə xoche bito chcuasə'əchon. Na' Diozən' none' cuerp chechon' ca chi' yichjcho che part ca' de'en cui zjənaquə xoche. ²⁵Ca'aczən' bsi'e xneze par nich chio'o cho'ela'ocho Cristən' goncho txen tocho yetocho na' cue' yichjcho gaquəlen ljuežjcho. ²⁶Na' šə bin' chac che tocho, yoguə'əcho chi' saquə'əcho txen. Na' šə chac güen che yetocho, yoguə'əcho socho mbalaz.

²⁷Yoguə'əcho ngodə'əcho txen len Cristən' na' to tocho gwxaquə'əlebecho ca to part cuerp che'ena'. ²⁸Na' entr chio'o chdopə chžagcho cho'ela'ocho Cristən', Dioz nan' gwleje' neto' naquəto' apostol, na' de'en ngüe'e lao na'ato' gonto' naquən de'e zaquə'əchgüei. Na' leczə'en gwleje' yebale' par chəsə'əyixjui'e de'en ne'ena'. Na' de'en chso'one'ena' leczə naquən de'e zaque'e. Na' yebale' gwlej Diozən' par choso'osed choso'olo'ine' xtiže'ena'. Na' de'en choso'osed choso'olo'ine' xtiže'ena' leczə naquən de'e zaque'e. Na' leczə gwlej Diozən' beṇə' chso'on miłagr na' beṇə' chso'on par chəsya'əyaque beṇə' chsa'acšene, na' beṇə'

chsa'aclen yeziquə'əchlə beṇə' šə bi de'en chəsə'əyažjene'. Na' gwleje' beṇə' chəsə'anabia' chio'o chdopə chžagcho cho'ela'ocho Cristən', na' gwleje' beṇə' chso'e gwde gwdele dižə' de'en cui chse'ejni'ine' con catə' chon Spiritən' ca chso'en. ²⁹Pero caguə yoguə'əcho naccho apostol. Na' Diozən' bito gwleje' yoguə'əcho par chixjue'echo bi de'en bagwne' chio'o, na' nic gwleje' yoguə'əcho par əgwsed əgwlo'icho xtiže'ena', na' nic gwleje' yoguə'əcho par goncho miłagr. ³⁰Caguə yoguə'əcho chac goncho ca yesya'əyaque beṇə' chsa'acšene, na' caguə yoguə'əchon' chon Spirit che Diozən' par güe'echo gwde gwdele dižə' de'en cui chejni'icho, na' caguə yoguə'əchon' chac yozejni'icho bi zejen dižə' de'en chon Spiritən' ca chso'e. ³¹Chonle güen šə chzelažə'əle gaquəlen Spirit che Diozən' le'e gonle de'e ca' de'en naquəch de'e zaque'e. Pero əgwlo'ida' le'e yeto de'e gonle de'en naquə de'e žialao xench.

Cheyalə' gaque che ljuežj beṇəchcho

13 La'anə'əczə šə chaccho gwde gwdele dižə' de'en chsa'ac beṇəchən' na' de'en chsa'ac angl ca', pero šə bito chaquecho che ljuežj beṇəchcho, bito bi bi zaquə'əcho. Con gwxaquə'əlebecho ca pedas ya de'en chso'on sšag na' ca platiy de'en choso'osiž beṇə' gocuež ca' la' xtižə'əchon' bitobi bi zaquə'an. ²Na' la'anə'əczə šə bagocwlen Spirit che Diozən' chio'o par nich chyixjue'echo bi de'en bagwne' chio'o len yelə' guac che Spiritən', bito bi zaquə'əcho šə bito

chaquecho che ljuežj beṇachcho. La'anə'əczə šə nezecho yoguə'əloł de'en cui no gwneze antslə, len la'anə'əczə šə chejni'icho yoguə'əloł de'en naquə de'e zaque'e, bitoczə bi zaquə'əcho šə cui chaquecho che ljuežj beṇachchon'. Na' la'anə'əczə šə lechguale chonlilažə'əcho Diozən' par ničh chone' bitə'ətezə de'e zdebə de'en chṇabechone' gone', bitoczə bi zaquə'əcho šə cui chaquecho che ljuežj beṇachcho. ³Na' šə cui chaquecho che ljuežj beṇachchon' bito bi zedəgua'an par chio'lo la'anə'əczə šə əgwnežjwcho beṇə' yašə'an yoguə' de'en deicho. Le'egatezə ca' šə cui chaquecho che ljuežj beṇachchon' bitobi zedəgua'an par chio'lo la'anə'əczə šə əgwnežjo cuincho yoso'ozeye'.

⁴Šə chaquecho che ljuežj beṇachcho, napcho yelə' chxenlažə' len lega'aque', na' choncho güen len lega'aque'; bito chgue'iga'aquechone' šə chac güen chega'aque'; na' bito cho'elao' cuincho; na' bito cha'alazə'əcho. ⁵Na' catə' chaquecho che ljuežj beṇachcho, bito choncho nacze len lega'aque', bito choncho xbab che cuinzcho, bito naccho beṇə' xtišjw, na' bito naccho beṇə' ggo'olazə'e. ⁶Na' catə' chaquecho che ljuežj beṇachcho bito chebeicho šə non' chon de'e mal, sino que chebeicho šə non' chon de'e güen. ⁷Šə chaquecho che ljuežj beṇachcho chapcho yelə' chxenlažə' bitə'ətezə de'en chso'one beṇə' chio'lo, na' choncho xbab güen che yoguə'əloł beṇə', na' zocho lez so'on beṇə' güen yoguə' las, na' chgo'lo chchejlažə'əcho len bitə'ətezə de'en chac.

⁸Cuat əžin ža catə' cuich cheyalə' gaquecho che ljuežj beṇachcho. Pero gwžin ža catə' cuich gon Diozən' par ničh no chixjue'e bi de'en bagože'ene'. Na' gwžin ža catə' Spirit che'ena' gonən ca cuich əso'e gwde gwdelə dižə' de'e cui chse'ejni'i beṇə' yoblə. Na' leczə gwžin ža catə' te che yoguə'əloł de'en neze chio'lo beṇach lao yežlyo nga. ⁹Bitonə' nezecho yoguə'əloł de'e ənezecho na' niqenə' gac chixjue'echo yoguə'əloł de'en bagwna Diozən' chio'lo. ¹⁰Pero gwžin ža catə' gaquə cayanə'an chene'e Diozən' gaquə, na' cana'achən' cuich bi bi yega'an de'en cui gaquə cayanə'an chene'e Diozən'.

¹¹Catə' goccho bidao' be'echo dižə' can' chsoe' notə'ətezə bidao' dižə', na' leczə xbab chechon' goquən ca xbab chega'acbo'onə', na' gwyejni'icho con can' chse'ejni'ibo'. Na' na'a bagwcha'ocho bitoch choncho can' chso'on bidao'. ¹²Pero bitonə' šejni'icho binlo che Diozən'. De'e na'anə' gwxaquə'əlebecho ca beṇə' chgüie' beṇə' yoblə to lo'lo spejw de'e cuitec chloe' binlo. Pero gwžin ža catə' šejni'iyane'echo che Diozən' can' chejni'ine' checho na'a. ¹³Na'a ža, de'e quinga šonə chon Diozən' mendad goncho zejlicane: gonlilažə'əchone', socho lez gaquə güen checho, gaquecho che Diozən' na' che ljuežj beṇachcho. Pero de'en naquə de'e žialaoch goncho entr šonə de'e quinga, gaquecho che Diozən' na' che ljuežj beṇachcho.

Beṇə' ca' chso'elen Diozən' gwde gwdelə dižə' de'en cui chse'ejni'ine'

14 Cheyalə' güe'elazə'əcho par gaquechecho che

Diozən' na' che ljuežj beṇačcho, na' lecə cue' yichjcho gaquəlen Spirit che'enə' chio'o par goncho xšine'enə'. Na' mazəchlə cheyałə' cue' yichjcho par gaquəlenən chio'o chixjue'echo de'en əṇa Diozən' chio'o. ²Bałcho chon Spiritən' par nič chchoj catə' cho'elencho Diozən' gwde gwdełə dižə' de'en cui chejni'icho. Na' catə' cho'elencho Diozən' gwde gwdełə dižə'an ca', caguə beṇač na'ana' cho'elenchon chedə' bito chse'ejni'ine' dižə'an. Spirit nan' chonən par nič cho'echo dižə' de'en chejni'i tozə Diozən'. ³Pero catə' chyixjue'echo de'en bagwna Diozən' chio'o choncho par nič ljuežjcho ca' nitə'ətezə nite'e so'onlilažə'e le', na' chtipcho lažə'əga'aque', na' lecə cho'ega'acchone' balor par nite'e mbalaz. ⁴Catə' Spirit che Diozən' chonən par nič cho'elenchone' gwde gwdełə dižə' de'en cui chejni'icho, yichjla'ažda'ocho na'agan' chaclenən. Pero catə' Spirit che Diozən' chaclenən par nič chyixjue'echo de'en bagwna Diozən' chio'o, chaclenən yoguə' chio'o chdopə chžagcho cho'ela'ocho Cristən'.

⁵Yebeida' žalə' Spiritən' gonən par nič yoguə'əle güe'elenle Diozən' gwde gwdełə dižə', pero gobeichda' žalə' gaquəlenən yoguə'əle par chixjue'ele de'en ye'e le'e. Ben' chyixjue'e de'en bagož Diozən' le', chone' to de'e zaquə'əche cle ca de'en chon ben' cho'elen Diozən' gwde gwdełə dižə'. La' šə cui no zo no əgwzejni'i yeziquə'əchlə beṇə' chso'elao' Cristən' bi dižə'an cho'e, bito no gaquəlenən. ⁶Beṇə'

bišə', nezdə' bito gaquəlenən le'e šə güe'elena' Diozən' gwde gwdełə dižə' catə'an yida' dezlaṇa'a le'e. Pero gaquəlenən le'e šə əgwzejni'ida' le'e bi de'en babsed bablo'i Diozən' nada'. Na' guaquəlenczən šə əgwzejni'ida' le'e bichlə de'en nezdə' che Diozən'. Guaquəlenczən šə chixjue'ida' de'en əṇa Diozən' nada'. Na' lecə gaquəlenən šə gwsed gwlo'ida' le'e bi zeje xtižə'enə'.

⁷Ca naquə flaudən', šə tozə can' gwcuež beṇə' gocuežən' len dote tyemp, notono gacbe'i bi piesən' chcueže'. Le'egatezə ca' arpən' šə tozə can' ggoł beṇə' gocuežən' len dote tyemp, notono gacbe'i bi piesən' chgołe'. ⁸Catə' zo to beṇə' chcueže' cornetən' par nič chəsə'əneze soldad ca' naquən' so'one', šə bito əgwcueže'en clar, bito se'ejni'ine' naquən' cheyałə' so'one'. ⁹Le'egatezə ca' chio'o ža, šə güe'elencho Diozən' dižə' de'en cui chse'ejni'i beṇə', bito gaquəlenən lega'aque'. ¹⁰Nezecho de que beṇə' ža' doxen yežlyo nga gwde gwdełə dižə' de'e chsa'aque', na' to toga'aque' chse'ejni'i xtižə' ljuežjga'aque'. ¹¹Na' šə chio'o bito chaccho dižə' de'e chac yeto beṇə', nezecho le' naque' beṇə' zitə' na' chio'o naccho beṇə' zitə'. ¹²Na' le'e chi' yichjle gaquəlen Spirit che Diozən' le'e, ca'aczən' co' yichjle gonle xšine'enə' par gaquəlen ljuežjle. Gonle ca' nič yoguə'əle chdopə chžagle cho'ela'ole Cristən' sotezə sole gonlilažə'əlene'.

¹³Na' šə Spiritən' gonən ca əchoj catə' güe'elencho Diozən' gwde gwdełə dižə', cheyałə nabecho

Diozən' gaquəlenche' chio'o par nich əgwzejni'icho beṇə' bi zejen dižə' de'en cho'elenchone'enə'.

¹⁴Na' catə' choncho orasyonṇə' šə Spirit che Diozən' chonən par cho'elenchone' dižə' de'e cui chejni'icho, bito bi xbab choncho lo'o yichjla'ažda'ochoṇ' catə'ən cho'echon, con chache'icho de que Dioz na'aczən' cho'ela'ocho.

¹⁵Quingan' cheyalə' goncho, catə' goncho orasyonṇə' güe'echo dižə' de'en əgwzejni'i Spirit che Diozən' chio'o, pero goncho xbab che dižə' de'en cho'echon'. Na' catə' golcho, golcho bi de'en əgwzejni'i Spirit che Diozən' chio'o, na' leczə goncho xbab che de'en cholchon'. ¹⁶Legon xbab nac gaquə šə güe'echo yelə' choxcwlen che Diozən' len dižə' de'en cui chejni'i yoguə'əcho. Beṇə' cuiṇə' yesə'əneze naquən' choncho lao chdopə chžagcho cho'ela'ocho Cristən', bito se'ejni'ine' bin' nacho na' de'e na'anə' bito əso'e yelə' choxcwlen che Diozən' txen len chio'o. ¹⁷Bito gaquəlenən lega'aque' šə goncho orasyon len dižə' de'e cui se'ejni'ine' la'aṇə'əczə šə de'e li güe'echo yelə' choxcwlen che Diozən' binlo. ¹⁸Cho'a yelə' choxcwlen che Diozən' de que Spirit che'enə' chonən par nich cho'elencha'ane' gwde gwdele dižə' mazəchlə ca chonən len notə'ətezachle. ¹⁹Pero catə' ndopə nžagcho cho'ela'ocho Cristən' la'aṇə' gueyə'əzə dižə' de'en chejni'i yoguə'əcho gwsed gwlo'ida' le'e zejəchen cle ca gua'a ši mil dižə' de'en cui chejni'icho.

²⁰Beṇə' bišə, naquəczən güen gaccho ca bi'i che'eṇ dao' laogüe

de'en cui goncho de'e mal. Pero cheyalə' šo'ocho xbab che beṇə' cha'o na' bito šo'ocho xbab che bi'i cuiṇə' šejni'i. ²¹Xtižə' Diozən' nyojən nan: "Nada! Dioz gona' par nich beṇə' zitə' ca' əso'elene' beṇə' Izrael ca' dižə' de'e cui se'ejni'ine', na' yesyə'əbane beṇə' Izrael ca', pero bia'aczə bito yoso'ozenague' chia'." Can' na Xancho Diozən'. ²²Šə nitə' beṇə' cui chse'ejle' che Diozən' na' choso'ozenague' catə' güe'elenle Diozən' gwde gwdele dižə' de'en cui chejni'ile yesyə'əbanene' na' sa'acbe'iljeine' de que zoczə Diozən' len le'e. Na' ca naquə chio'o cho'ela'ocho Cristən', banezecho de que zoczə Diozən' len chio'o. Na' catə' to beṇə' chyixjue'ine' bi de'en bagož Diozən' le', chaclenən chio'o chonlilažə'əcho Cristən' la'aṇə'əczə cui chaclenən beṇə' cui chso'onlilažə'ene'. ²³Legon xbab nac gaquə šə lao ndopə nžagcho txen cho'ela'ocho Cristən' yoguə'əcho solao güe'elenchone' gwde gwdele dižə' de'e cui chejni'icho. Na' šə da'acclə beṇə' cui chso'onlilažə' Cristən' o beṇə' cuiṇə' yesə'əneze naquən' choncho cho'ela'ochone', əse'enene' cho'elenchone' gwde gwdele dižə' na' so'one' xbab de que chac tontchon'. ²⁴Pero nž'an šə to tocho chyixjue'echo bi de'en bagwna Diozən' chio'o. Šə yezidəclə to beṇə' cuiṇə' gonlilažə' Cristən' o to beṇə' cuiṇə' neze naquən' choncho cho'ela'ochone', gacbe'ine' de que de xtole'e catə' to tocho chyixjue'echo bi de'en bagwna Diozən' chio'o. ²⁵Na' catə' gacbe'ine' de que la'aždaogüe'enə'

naquən mal lao Diozən' gwzolja xibe' güe'elaogüe'ene' na' əne' de que zoczə Diozən' len chio'o chonlilažə'əcho Cristən'.

Cheyalə' gwsa'acho coltən' binlo na' cui gonchon chac yazə

²⁶Na'a ža beṇə' bišə', catə'an chdopə chžagle txen baļle goļle to imno, na' baļle de de'e əgwsed gwlo'i ljuēžjle, na' baļle güe'ele dižə' che to de'en babzejni'i Spirit che Diozən' le'e, na' baļle güe'ela'ole Diozən' güe'elenlene' gwde gwdele dižə' de'en cui chejni'ile, na' yebaļle yozejni'ile dižə' de'en gwso'elen beṇə' ljuēžjle ca' Diozən'. Naquəczən güen gonle yoguə' de'e ca' con šə gonlen ca sa'aclenən beṇə' ljuēžjle ca' so'onlilažə'əche' Cristən', beṇə' ca' nacle txen cho'ela'olene'. ²⁷Na' šə nole güe'elenle Diozən' gwde gwdele dižə' de'en cui chejni'ile, legüe'elene'en pero do chopzle o šonzle na' tgüejə tgüejle. Nach te na' əchoj to beṇə' yozejni'ine' bi zeje dižə' de'en be'elenle Diozən'. ²⁸Na' šə cui no zo no yozejni'i bi zeje dižə' ca', bitoclə güe'elenle Diozən' dižə'an nac ca' zižjo lao ndopə nžagle txen. Con lo'o la'ažda'ole na'azə güe'elenlene'ena'. ²⁹Na' le'e bagocwlen Spiritən' par chyixjue'i ljuēžjle de'en bagwna Diozən' le'e, lecə do chopzle o šonzle əchojle chixjue'elen lao ndopə nžagle, niçh beṇə' ca' yela' yoso'ozenague' na' so'one' xbab šə de'en na to tole za'an che Diozən'. ³⁰Na' šə lao choe' toe' dižə'an Diozən' əgwzejni'ine' yetoe' to de'e chixju'i'e, ben' bacho'eczə dižə'an

cheyalə' cueze' žlac güe' ben' yeto dižə'əna'. ³¹Chaclenczə Spiritən' yoguə'əle par niçh tgüejə tgüejle chyixjue'ele bi de'en bagwna Diozən' le'e, chozejni'i ljuēžjle na' chtiplažə' ljuēžjle. ³²Spirit che Diozən' chonən par niçh baļle chac chixjue'elen bi de'en bagwna Diozən' le'e. Na' chixjue'elen con cata'əzən' chache'ile naquən güen par chixjue'elen. ³³⁻³⁴Diozən' chene'ene' əgwsa' colt chechon' binlo na' cui ša'acho chac yazə.

Na' gatə'ətezə chəsə'əadopə chəsə'əžag beṇə' bagwlej Diozən' par zjənaque' lažə' ne'ena', bito cheyalə' soe' no'ol ca' dižə' lao coltən'. Cheyalə' yesə'əlo'e de que choso'ozenague' che chio'o beṇə' byo la' can' na Xtižə' Diozən' de'en nyojən'. ³⁵Na' šə de bi de'e chse'lene'e no'ol ca' yesə'əneze'ne', cheyalə' yesə'əṇabe' be'en che to toga'aque' cata' yesyə'əžine' ližga'aque', cheda' naquən to yelə' zto' šə no'olən' güe'ele dižə' lao ndopə nžagcho cho'ela'əcho Diozən'.

³⁶Le'e beṇə' Corinto, bito cheyalə' gonle xbab de que le'ezən' zaquə'əle par əṇale naquən' gon chio'o chonlilažə'əcho Cristən'. Caguə zguə'atec le'en gwdisle xtižə' Diozən', len caguə le'ezən' nombi'alen. ³⁷Baļle nale chon Spirit che Diozən' par niçh chyixjue'ele bi de'en bagwna Diozən' le'e, na' baļle nale de que Spirit che Diozən' chaclenən le'e par chonle bichlə de'en chene'e Diozən'. Šə de'e li chaclen Spiritən' le'e nachən' guacbe'iczele de que mendad che Xancho Crist na'anə' chzoja' le'e yoguə' de'e quinga. ³⁸Šə nole cui

chejle'ele de que Cristən' chone'
par niĉ chzoja' de'e quinga, bito
chaclen Spirit che Diozən' le'e šə ca'.

³⁹Na'a ža beŋə' bišə', de'e yoblə
chnia' le'e, leŋabe Diozən' gaquəlen
Spirit che'enə' le'e par niĉ
chixjue'ele de'en əna Diozən' le'e.
Na' šə Spirit che Diozən' gonən par
niĉ beŋə' ljuežjle ca' əso'elene'
Diozən' gwde gwdele dižə', bito
gwžonle əso'elene'en le'. ⁴⁰Pero
bitə'ətezə de'en gonle lao coltən',
legwsa'an binlo, na' bito gonlen
chac yazə.

Beban Jesocristən' ladjo beŋə' guat ca'

15 Beŋə' bišə', che'enda'
yosa'alažə'əle dižə' güen
dižə' cobə che Cristən' de'en
babe'elena' le'e antslə. Babzenagle
chei na' zotezə zole chdalenlen. ²Na'
šə talenczle dižə' güen dižə' cobə
che Cristən' de'en babe'elena' le'e,
nezele de que žjəyezole len Diozən'.
Pero šə bito talenle dižə' güen dižə'
cobə che'enə' bitobi zejen de'en
nale de que bachejle'ele che dižə'
güen dižə' cobə che'enə'.

³Diozən' bzenene' nada' de'en
zjənaquə de'e žialao xench ca
bitə'ətezəchlə na' baĉ bsd
blo'ida'an le'e. Gwnia' le'e de que
gwso'ot beŋə' Cristən' gwduxjue'
xtolə'əchon', con can' byoj Xtižə'
Diozən' gaquə. ⁴Lecezə bgašə'
Cristən' pero na' beyas bebane'
ladjo beŋə' guat ca' beyon ža con
can' byoj Xtižə' Diozən' gaquə.
⁵Na' bi'a dižə' can' ben Cristən'
beyož bebane' ladjo beŋə' guat ca',
jəyeloe' laogüe' Bedən' na' gwde
na' jəyeloe' laogüe' yeziquə'əchlə

disipl che' ca' lao nite'e txen,
beŋə' ca' gwsa'ac šizine' antslə.

⁶Na' gwde na' jəyezloe' laogüe'
mazlə gueyə' gueyoa beŋə' zjənitə'
tši'izə chso'elao' le'. Na' zan beŋə'
ca' nezejmban na'a la'anə'əczə
bagwsa'at bale'. ⁷Le'egatezə ca'
jəyezloe' laogüe' Jacobən' nach
gwde na' jəyezloe' laogüe' yoguə'
apostol ca'.

⁸⁻⁹Na' le'ezelaogüe' bedeyeloe'
laogüe' nada'. Na' gwxaquə'əlebəda'
ca to bi'i goljə sin cuinə' žin
ža, chedə' ca tyempən' bitonə'
gonlilaža'a Cristən', gwda' bĉhi'
bsaca'a beŋə' ca' bagwlej Diozən'
par chəsə'ədopə chəsə'əžague'
chso'elaogüe'e Cristən'. De'e na'anə'
chacda' naca' le'ezelaogüe' apostol
beŋə' cui bi zaquə' entr beŋə'
ljuežja' ca', na' chacda' bitoczə
zaca'a par naca' apostolən'. ¹⁰Pero
bia'acžə nži'ilažə' Diozən' nada'.
De'e na'anə' gwleje' nada' par
naca' apostol che'enə', na' de'e
na'anə' bagocwlene' nada' par
niĉ choncha' xšine'enə' mazəchlə
ca de'en chso'on yoguə' apostol
ca' yelə'. Pero bito ənacho toza'
nada' chona' xšine'enə' sino que
Dioz na'acžən' chaclene' nada' par
chona'an. ¹¹Na' bachejle'ele che
dižə' güen dižə' cobə che Cristən'
de'en babzejni'ida' le'e na' de'en
baboso'ozejni'i apostol ca' yelə' le'e.

Yesyə'əban beŋə' guat ca'

¹²Na' baĉ bsd blo'ito' le'e
de que Cristən' beyas bebane'
ladjo beŋə' guat ca'. Pero le'e
ža, čbixĉen' na balle de que bito
yesyə'əban beŋə' guat ca'? ¹³Žalə'
naquən de'e li can' nalen' de

que Diozən' bito yosbane' beṇə' guat ca', bitolja bosbane' Cristən' žalə' ca'. ¹⁴Na' žalə' cui bosban Diozən' Cristən' ladjo beṇə' guat ca', bito bi zaquə' xtižə'enə' de'en babe'elento' le'e na' bitobi zejen de'en chonlilažə'ačhəne' žalə' cui bebane'. ¹⁵De'en babsed blo'ito' le'e de que Diozən' bosbane' Cristən' ladjo beṇə' guat ca', babe'eto' dižə' güenlažə' žalə' bito naquən de'e li. Žalə' de'e li bito yosbane' beṇə' guat ca', bito bosbane' Cristən' žalə' ca'. ¹⁶De'e na'anə' bito cheyalə' goncho xbab de que Diozən' bito yosbane' beṇə' guat ca', cheda' la' bosbane' Cristən'. ¹⁷Bito bi bi zedəgua'an de'en chonlilažə'ačo Cristən' žalə' cui bosban Diozən' le' ladjo beṇə' guat ca'. Bito gaquə' əgwnitlaogüe' xtolə'ačhon' žalə' cui bebane'. ¹⁸Beṇə' ca' bagwsa'at beṇə' gwso'onlilažə' Cristən' žlac gosə'əbane' bagosə'əbiayi'e na' bito nite'e len Diozən' ṇa'a žalə' cui beyas beban Cristən' ladjo beṇə' guat ca'. ¹⁹Probchguazə' chio'o žalə' yežlyo ngazən' zocho lez gaquəlen Cristən' chio'o. Chxoayagzə' cuincho mazəchlə' ca' notə'ətezəchlə' beṇə' žalə' ca'.

²⁰Na' de'e liczə' Dioz nan' bolis bosbane'ene' ladjo beṇə' guat ca', par ničh ṇezecho de que ca'aczən' gone' len beṇə' yeziquə'ačhlə' beṇə' chso'onlilažə' le'. ²¹To beṇə'ən ben par ničh chsa'at beṇə'čən', na' to beṇə'ən gon par yesyə'əbane'. ²²Adan nan' ben par ničh chsa'at yoguə' beṇə'čən', na' Crist nan' gon par yesyə'əban yoguə' beṇə' chso'onlilažə' le'. ²³To tocho yebancho con catə'ən babsi'e xneze.

Zgua'atec Cristən' bebane' ladjo beṇə' guat ca', na' catə'ən yide' yeto le'egatezəczə' ca' yesyə'əban beṇə' ca' bagwsa'at, con beṇə' gwso'onlilažə'ene'. ²⁴⁻²⁶Cristən' chnabi'e doxenlə. Na' əgwlej əgwšoşje' yoguə' beṇə' contr che' ca' na' bichlə de'e ca' chso'on contr le', na' que'e yelə' gwnabia' che de'e xio' ca' na' che angl bzelayo ca' na' che notə'ətezəchlə' beṇə' gwnabia' beṇə' cui chso'elao' le'. Na' catə' Cristən' babeyoż blej bšoşje' yoguə' beṇə' contr che' ca' na' bichlə de'e ca' chso'on contr le', nach gwcueze' yelə' gotən' na' šo'o fin che yežlyon'. Na' cana'achən' Cristən' cue'e lao na' Xe' Diozən' yoguə' de'en ṇlane' chnabi'e na' yoguə' non' chnabi'e. ²⁷Xtižə' Diozən' de'en nyojən nan: "Diozən' bansi'e xneze de que gwžin ža catə' Cristən' ṇabi'e yoguə'əloj beṇə' na' biquə'ačhlə' de'en zjəde." Pero ca' de'en nan de que Cristən' ṇabi'e yoguə'əloj beṇə' na' biquə'ačhlə' de'en zjəde, bito ṇacho zejen de que leczə' Cristən' ṇabi'e Xe' Diozən'. ²⁸Na' catə' Cristən' bagwlo'e lao na' Xe' Diozən' yoguə'əte beṇə' na' len yeziquə'ačhlə' de'e zjəde, cana'ach əgwlo'e de que leczə' le' yo'e lao na' Xe' Diozən'. Nach yoguə'əloj beṇə' əsa'acbe'ine' de que Diozən' naque' xanga'aque', na' leczə' ca' sa'acbe'i angl na' de'e xio' ca'.

²⁹Nitə' beṇə' chəsə'ačhoe' nis de'e non che beṇə' ca' bagwsa'at. Bito so'one' ca' žalə' cui chse'ejle'e de que gwžin ža yesyə'əban beṇə' guat ca'.

³⁰Nada' ža, do tyempte nitə' beṇə' chse'enene' so'ote' nada' laogüe

de'en cho'a xtižə' Cristən'. ³¹Beṇə' bišə', de'e li yoguə' ža chsanlažə' cuina' gaquə bitə'ətezə de'e gaquə chia'. Che'enda' nezele de que chsanlažə' cuina' can' banezele de que chebeichgüeida' de'en chonlilažə'əle Xancho Jesocristən'. ³²Na' guac əṇacho de que por bež əṇnian' jətilələna' catə'ən jsoa' Efeson' chedə' gwso'onchgua beṇə' ca' contr nada'. Pero ža'alə cui yesyə'əban beṇə' guat ca', bitobi bi zaquə' ca de'en goquə chia'. Na' žalə' bito yesyə'əban beṇə' guat ca' yejni'a gonecho che de'en na: "Ye'ej gaotezcho, la' gwxezən' gatcho."
³³Bito güe'ele latjə no əxoayag le'e, chedə' de'e li can' nyojən nan: "Šə socho txen len beṇə' chso'on de'e mal, la' solao goncho can' chso'one'lenə'." ³⁴Legwša' xbab chelen' na' cuich gonle de'e malən'. Nia' ca' chedə' ba'lle bitonə' gombi'ale Diozən' na' che'enda' gaquəchgüeile lo'o la'ažda'olen' de'en cui nombi'alene'.

De'e cobə yeyac cuerp che beṇə' ca' yesyə'əban ladjo beṇə' guat ca'

³⁵De repent gwṇabljeile nada' nac gaquən' yesyə'əban beṇə' guat ca' o nac gaquə cuerp chega'aque'lenə' catə'ən yesyə'əbane'. ³⁶Nchol yichjla'ažda'olen' šə chaquele cui gaquə yesyə'əbane'. Nezecho de que to to xoa' dao' de'en chazcho cheyalə' yexinjən par yela'an yel dao'. ³⁷Na' bito əṇacho de que catə'ən chazchonə' chazcho yel dao'. Na' can' šə biquə'əchlə de'e chene'echo la'ac, con xsei nan' gazcho. ³⁸Na' Diozən' chone' par niçh chla' de'en chazchon' na'

to ton chaquən seğon bi de'en chazchon'. ³⁹Ca'aczən' naquən caguə tozə ca naquə cuerp chechon' len cuerp che bia ca' chsa'aš. Nža'an naquə cuerp che beṇəchən' na' nža'an naquə cuerp che bia žia tap ni'ane'li, na' nža'an naquə che bia chsa'aš lo'o nis, na' nža'an naquə che bia chsa'aš lao be'. ⁴⁰Na' nža'an zjənaquə beṇəch ca' na' bia ca' chsa'aš lao yežlyon', na' nža'an zjənaquə de'e ca' chle'icho le'e yoban'. Nža' yelə' xoche che de'e ca' chle'icho le'e yoban' na' nža' yelə' xoche che beṇəch ca' na' bia ca' chsa'aš lao yežlyo nga. ⁴¹Nža' can' chse'eni' bgüižən' na' nza' can' chse'eni' bio'onə' na' leczə nža' can' choso'ose'eni' to to beljw ca'. ⁴²Le'egatezəczə ca' catə' yesyə'əban beṇə' ca' gwso'onlilažə' Cristən' žlac gosə'əbane', nža'an gaquə cuerp chega'aque'lenə'. Cuerp chega'aque'lenə' de'en besə'əgašə' lo'o ban' bagwso'ožə'ən, pero catə' yesyə'əbane' ladjo beṇə' guat ca' yeyac cuerp chega'aque'lenə' de'e cobə na' bitoch sa'ate'. ⁴³Bitobi bi zaquə' cuerp che beṇə' guat ca', la' zjənaquən cuerp šen. De'e na'anə' chcuəšə'əchon. Pero catə'ən yesyə'əbane' yetlas, šə gwso'onlilažə'e Cristən' žlac gosə'əbane', yesyə'əyac cuerp chega'aque'lenə' de'e zaquə'əche na' de'e gualəch clezə can' əgwsa'aquən antslə. ⁴⁴Cuorp che beṇə' guat ca' de'en chcuəšə'əchon' zjənaquən de belə' chen, pero nža'an yesyə'əyaquən catə'ən yesyə'əbane' šə gwso'onlilažə'e Cristən'. Cana'achən' yesyə'əyaquən por cuerp cobə de'en gon can' əṇa

Spirit che Diozən!. Na'a zjənaquə cuerpən' de belə' chen, pero gwžin ža gatə' cuerp cobə de'en gon can' əna Spirit che Diozən'.

⁴⁵Xtižə' Diozən' nyojən nan de que Adannə' ben' naquə beṇə' nechən' gwzoe' bguane'. Pero na' zo yeto beṇə' gwxaquə'əlebene' ca Adannə', le'enə' Cristən'. Na' de'en bebane' ladjo beṇə' guat ca' chone' yelə' mban zejlicanən'. ⁴⁶Na'a naccho beṇə' belə' chen pero gwžin ža catə'an gatə' cuerp cobə chechon' de'en gon can' əna Spirit che Diozən'. ⁴⁷Adannə' ben' goquə beṇə' nech, Diozən' bene' le' len bište yo na' gwzoe' yežlyo ngazə. Pero ben' gwxaquə'əlebe ca Adannə' de'en bxie' yelə' mban zejlicane bazocze' yoban' antslə ze'e yide' galje' yežlyo nga, le'enə' Xancho Cristən'. ⁴⁸Na' chio'o beṇəch cuerp chechon' naquən can' goquə cuerp che de'e Adannə' de'en ben Diozən' len bište yon', na' de'e na'anə' naccho beṇə' che yežlyo nga. Pero na' chio'o chonlilažə'əcho Cristən' gwžin ža catə' gatə' cuerp cobə checho de'en gaquə ca cuerp che Cristən' ben' zo yoban'. ⁴⁹Na'a nenaccho ca ben' ben Diozən' len bište yon' pero gwžin ža gaccho ca Cristən' ben' zo yoban'.

⁵⁰Beṇə' bišə' əchnia' le'e catə'an yežincho žjəyezochə len Diozən' zejlicane bito gaquə əbanecho cuerp chechon' de belə' chennə'. De'e te che cuerp chechon' na' de'e na'anə' bito gaquə əbanechon catə' žjəyezochə len Diozən' zejlicane.

⁵¹Na'a əchnia' le'e de'en cui nonə' neze antslə, caguə yoguə'əchon' gatcho, pero yoguə'əchon' yeža'

can' gacchon'. ⁵²Xtitnez yeža' can' gacchon' catə'an cuež trompet che Diozən' par šo'o fin che yežlyon'. Cuež trompet che Diozən' par yesyə'əban yoguə' beṇə' bagwsa'at con beṇə' gwsə'onlilažə' Cristən'. Na' canan' yeyac cuerp chega'aque'enə' de'e cobə de'en cui te chei na' leczə can' yeyac cuerp che chio'o ne'e mbancho. ⁵³Cuorp checho de'en mbanecho yežlyo nga na'a de'e te chein' chedə' gožə'an catə'an gatcho. Pero catə'an yeyac cuerp chechon' de'e cobə bito gožə'an na' bito te chei. ⁵⁴Na' catə' bade cuerp cobə checho de'en cui gožə' na' de'en cui te chei, cana'achən' bagoc complir can' nyoj Xtižə' Diozən' nan: "Diozən' gwzoinə' bcueze' yelə' gotən' chedə' le'enə' chone' yelə' mban zejlicane." ⁵⁵Na' cana'achən' əṇacho: "Bitoch soi yelə' gotən' chio'o na' bitoch gonən chio'o gan." ⁵⁶De yelə' got che chio'o beṇəch chedə' choncho de'e malən'. Na' de'en nezecho bin' non lei che Diozən' mendad goncho nachle chzenaguəchcho che de'e malən'. ⁵⁷Choxcwlen Diozən' bsele'e Xancho Jesocristən' ben' chon par nič cuich chzoi de'e malən' chio'o, na' le'enə' babene' par nič chio'o chonlilažə'əchone' šə gatcho leczə əžin ža yebancho ladjo beṇə' guat ca'.

⁵⁸De'e na'anə' beṇə' bišə' dao', lesotezə leso legonlilažə' Xancho Jesocristən' sin cui žjəxaquə'əlažə'əle na' sin cui gaquəžejlažə'əle. Na' zejli legonchgua xšin Xancho' la' nezczeele de que bito gaquə dadən.

**Choso'otobe' mech par
chsa'aclene' beṇə' ca' chso'onlilažə'
Cristən' Jerosalennə'**

16 Na'a ža che'enda' əṇia'
le'e naquən' gonle catə'
əgwtoḃle mechən' par gaquəlenle
beṇə' Jerosalen ca' bagwlej
Diozən' par zjənaque' lažə' ne'enə'.
Ləgon can' bena' mendad so'on
beṇə' ca' chəsə'ədopə chəsə'əžag
chso'elaogüe'e Cristən' to to yež
de'en zjəchi' Galasian'. ²Na' yoguə'
ža dmigw to tole cuejle latə' güejə
mech segon ca de'en beṇle gan
lao xmannə' na' co'oša'olen par
nič den catə'ən yida' dezlaṇa'a
le'e. Ləgon ca' par nič bito
əgwtoḃlen catə'ən yida'anə'. ³Na'
catə'ən yida'anə' cana' əselə'a
beṇə' ca' bagwlejlen' par əxjs'o'e
xmechlen' Jerosalennə', na'
əgoxə'tega'aca'ane' to čhopə cart.
⁴Pero šə gwxenlažə'əcho de que
nada' ša'a na' sa'aclene' nada' t xen.

**Pabən' chone' xbab
žjəlaṇə'e ləga'aque'**

⁵Na' yida' gan' zolen' catə'
yeyož tia' Masedonian', čhedə'
ləczə cheyaḃə' ša'a žjəlaṇa'a
beṇə' ca' chəsə'ədopə chəsə'əžag
chso'elaogüe'e Cristən' na'. ⁶Na' de
repent yega'ana' len le'e do t bio'
o čhop bio' o šə yega'ancza' dote
tyemp zaguən'. Na' catə' yeza'a gan'
zolen' le'e gaquəlenle nada' par
yeya'a ga yoblə. ⁷Bito yida' delana'a
le'e na'a čhedə' to teza'an šə baza'a,
la' che'enda' desoa' šša len le'e
catə'ən yida'anə' šə Xancho Diozən'
güe'e latjə. ⁸Che'enda' yega'ana'
Efeso nga xte catə' galə' lṇi de'en

ne' Pentecostes. ⁹Yega'ana' čhedə'
beṇə' zan nitə' nga beṇə' chse'ene'e
yoso'ozenague' che xtižə' Diozən'
pero ləczə nitə' beṇə' zan cui
chse'ene'e čixjui'an.

¹⁰Na' catə' yidə Temtion' gan'
zolen' cheyaḃə' gaplene' respet par
nič cui žebe' əgwseḃ əgwlo'ine'
le'e, čhedə' ləczə can' chona' nada'
xšin Xancho Diozən' ca'aczən' chon
le'. ¹¹De'e na'ana' ža bito gonle
xbab de que bitobi zaque'e, sino que
cheyaḃə' sole güen len le' na' len
beṇə' ca' žague'enə' catə' la'aque'
gan' zolenə'. Na' catə' yesa'aque'
cheyaḃə' gaquəlenga'aclene' par
deya'aque' gan' zoa' nga to šao' to
güen la' chbezəga'aca'ane'enə'.

¹²Na' ca naquə beṇə' bišə'əcho
Apolosən' ža, ləczə gotə'əyoida'ane'
par yidəlene' Temtion' na' len beṇə'
bišə'əcho ca' desə'əlaṇe'e le'e, pero
bene' xbabən' mejor bito yide' na'a.
Pero güide' catə' soe' to latjə.

**Yeto čhopə de'en che' Pabən'
beṇə' Corinto ca'**

¹³Cheyaḃə' gaple ciudad par nič
cui xoayagle len de'e malən', na'
cheyaḃə' sotezə sole gonlilažə'əle
Diozən' con can' chonlilažə'əczlene'.
Bito žeble sino leso ləgon can'
chene'e Diozən'. ¹⁴Na' ləgaque che
Diozən' na' che beṇə'chən' bitə'əteze
de'en chonle.

¹⁵Na' na'a ža beṇə' bišə', de to
de'e che'enda' əṇia' le'e. Nezele de
que family che Estefanas zjənaque'
beṇə' nech gwso'onlilažə'e
Cristən' Acayan', na' banezczele
can' chso'oncze', lechguale
chsa'aclene' notə'ətezəchlə beṇə'
bazjənaque' lažə' na' Diozən'.

¹⁶De'e na'anə' əchnia' le'e de que cheyałə' əgwzenagle che lega'aque' na' lenczə che notə'ətezəchlə beṇə' chso'onchgua xšin Diozən' na' che beṇə' ca' chsa'aclenchgua beṇə' bišə'əcho ca'. ¹⁷Chebeida' babla'ac Estefanasən', Fortonaton' na' Acaicon' gan' zoa' nga, na' bagwsa'aclene' nada' par niç bitoch zoa' trist de'en cui zole nga len nada'. ¹⁸Lechguałe bagwso'one' ca chebeida', can' bagwso'one' len le'e. De'e na'anə' cheyałə' gapəga'acchone' respet.

¹⁹Na' na'a ža əchnia' le'e de que beṇə' ca' chəsə'ədopə chəsə'əžag chso'elaogü'e Cristən' doxen Asian' chəsə'əguape' le'e diox. Na' lecə len Aquila na' no'ol che' Prisilan' nach zjələnczə beṇə' ca' chəsə'ədopə chəsə'əžag chso'elaogü'e Cristən' ližga'aque'enə', lecə chəsə'əguapchgü'e le'e diox.

Le'ga'aque' chso'onłilažə'əcze' Xancho Jesocristən' can' chonłilažə'əchone' chio'o. ²⁰Na' yoguə'əloł beṇə' bišə'əcho ca' nitə' nga chəsə'əguape' le'e diox. Na' catə' chežagle leyołgüiž ljuežjle dižə' šao' par niç gacbia' de que chaque che ljuežjle.

²¹Cuincza' nada' Pabən' chzoja' part dao' che cart nga par əchguapa' yoguə'əle diox.

²²Na' šə nənçixə' nole cuinə' gonle cas par gaquele che Xancho Jesocristən', cuiayi'išazəchle zejlicanen'. Xancho Jesocristən' yide' de'e yoblə.

²³Na' na'a ža, Xancho Jesocrist nan' sotezə soe' gaquəlenšgacze' le'e. ²⁴Na' chnia' le'e de que chacchgüeida' che yoguə'əle laogüe de'en chonłilažə'əle Cristo Jeso'osən'. De'e na'azən' əchnia' le'e. *Pab*